



08453

遊記第三冊上

江陰徐宏祖霞客著

子別姓

李

重校

李夢良會明編

吳縣張玉穀蔭嘉

重校

同邑

楊名時凝齋閱

族孫徐鎮筠峪

粵西遊日記

丁 閏四月初八日分顧僕舟抵桂林予同靜聞從湘江南

登涯為山角驛即黃沙也西南行大松夾道五里黃沙鋪又

二十二里捨官道右入山西向大山行四里止山下牛頭岡

初九日西五里至礮巖普潤寺洞前門東向如橋出水約三

十丈後門北向入水約十五丈泉自山後破石窟三級下故

遊記 三冊上 粵西一

曰礮西二里小石山元立路旁又三里張家邨邨後大山曰

廻龍巖南五里上大衝衝西半里飯福壽菴西北上柳山三

里宿獅子巖南清泉菴

初十日南下二里至湘山寺寺在全州西門外半里登殿拜

無量壽佛塔塔後有飛來石出寺由寺西泝羅江一里上捲

雲閣閣西為盤石半嵌江中絕壁有蓮花一瓣凹入壁間白

瓣黑崖又西一洞臨江泉由洞東裂石出曰玉龍泉復有一

石峰高豎共十五里度石蜺岡差南為龍隱洞小山獨立江

上門西向出洞而西抵橋度橋皮水東白龍水出口山聳秀

夾立



十一日度橋西北行十里北入峽爲山川口又十三里抵白竹江望西北鈎挂山甚元突聞其上金寶頂甚奇遂自白竹橋溯江西北五里進峽口兩山壁立夾溪沿溪東北崖上行緣崖高下屈曲十里出峽爲南洞聞南洞北五里洞盡可由四川嶺達寶頂但路已沒遂捨北道西渡溪上嶺嶺左腋有瀑布又十里至打狗凹宿興隆菴菴北高嶺卽金寶頂也十二日由菴西上沿崖北轉三下上又三度坳曲共三里踰土地坳西望新寧江已在山麓下山五里爲大竹坪坪北踰嶺共三里至大鼻山

十三日從大鼻邨後夾澗上一里飛瀑懸崖宛轉下修竹邨

遊記

三册上
粵西一

二

巖掩映卽西攀嶺上約行一里至南來大道乃從南大源上此者又四里至角菴基伏身蛇行菴後叢竹中四里乃從右崖叢中上又二里行觀音竹叢中竹大如管多竹實如蓮肉大採筍置路隅識來徑竹中上二里至寶頂殿基日甫中四山俱出南峰近爲鈎挂山石崖峭立東北向若削再南卽打狗嶺再南爲大帽再南爲南寶頂頂最高與北相頡頏而基後絕頂更倍之復從竹叢中東北上一里至頂其觀音竹更大笋腴美然叢密中無由四望登樹踐枝終不暢眺忽竹浪中出大石如臺梯躋其上羣山歷歷可縷數仍下山宿大鼻

十四日隨溪西下四里爲大源則大鼻西峽水與邨後東峽水會橋於上曰潮橋橋西爲大源邨子往南頂則從橋東隨澗南行里許渡木橋澗忽東折入山路南出山隘澗復墜路東破峽出連搗三潭上方瀑長如布中凹瀑轉如傾下圓整瀑勻成簾下二潭俱有圓石中立承水水墜潭作勢潏迴尤異又三里度橋爲桐初有水南自打狗嶺來會亦橋其上二水合而西南則又觀音橋跨之大道從觀音橋西踰嶺出子從橋下隨溪南一里水從西峽出路踰一嶺下墜深壑中四里至陳墓源瀑自東南山峽中踴躍出與東嶺溪合亦橋跨其會處大道與水俱南予度橋東躋嶺卽湧瀑南嶺也二里平行嶺脊北望北寶頂巖峽中水近自打狗南崖直逼其下南望新寧江流遠從巾子嶺橫界南寶頂之西其西南有峰尖突正當陳墓水口已而路漸出其下二里南下嶺行凹中二里又踰小嶺里許至蘇家大坪坪側大瀑破山西向出勢甚雄偉下爲大溪西北合陳墓源出口下午東南上一嶺溪東往大帽嶺道乃西南轉六里出南寶頂道桃子坪間上梁宿處四里而是踰嶺東至新開田所有路南下伏草中復悞出其東歷險陂三里不辨所向已忽得一龕地名挂幡去上梁五里矣其處五里至快樂菴又十里乃至南頂以暮雨

遊記

三册上
粵西一

三

十五日雨不止滯龕中

下缺一日

十七日從定心橋下過脊處覓蓮瓣隙痕削崖密附旁無餘徑乃從脊東隔峽望之痕雖呀然上垂下削非托廬架道處也乃上定心石過聖水涯再由捨身崖登飛錫絕頂返白雲菴

十八日由東路下山一里餘路旁峭石分列石級出其間爲天門門外聳石立路右上大書白雲洞天從此歷磴下危峭較勝西路四里經顯龍菴菴北向又東下南望隔山飛瀑自那拳山南腋下先從寶頂卽窺見至此始睹崇隆若九天也又東下五里北渡一小溪溪竹中有寺寂然則苦煉菴矣菴

遊記

三册上
粵西一

四

南向左右各一溪自後來繞而右溪較大橋橫其上水從西南山腋透壁下菴前東南度橋南上嶺其地竹甚大路始分東西岐從西下始見那又瀑北掛層崖苦煉溪亦透空懸壑與那又大小高下勢相頡頏然苦煉近在對山路沿之同下朗朗見其搗壑勢其下山環成城瀑垂其中出西壁與那又東大溪合而東南去又見西峽中一瀑透山下連瀉九層雖練細然甚危長路乃東轉下共三里又一溪自西北來渡而隨之始僅涓微漸下漸大遂成轟雷湧雪觀路循溪北東二里爲大坪右渡溪入一邨家邨西上流爲蓮花菴竹色叢鬱遂西南渡那又大溪溪東北出白沙江又西上嶺十三里抵

望江踰嶺溯溪又十里爲桐原山下山五里隨小車江南下
又四里桐原大溪自西來與江合而南去度小車江口橋從
水東上山隨江東南路行夾江山上極險峻一小石山北面
平剖江遶其南路遶其北東北又有小溪破峽成瀑凡東南
四里始下至江涯稍上有溪自東北來入其北峰曰不住嶺
十九日東南上嶺隨江東四里下涉跳石江又上山三里出
兩山峽口壩堰水甚巨曰上官壩壩外一望平曠直南抵裏
山隈出峽水東南入湘路隨峽右西南下一里抵白塘邨邨
後石山特立曰金鍾山下俱青石峭削西南渡溪橋過棄鷄
嶺其八里出咸水則官道山棗驛也渡橋西南行長松合抱
夾道蔽天極似道州永明道千里石脂鋪從小路東南折五
里抵界首爲全州興安界

遊記

三册上
粵西一

五

二十日溯湘江西五里出塔兒鋪古松時斷續不及全州連
雲接嶂也三十里至興安縣萬里橋橋下水遶北城西去兩
岸甃石中流平而不廣卽靈渠已爲漓江矣湘漓分水處尙
在東三里也由橋北溯靈渠北岸東行已復北折渡大溪則
湘江本流也上流堰不通舟旣渡又東有小溪疏流若帶舟
道從之蓋堰湘分水西注爲漓又東漓湘支以達舟楫稍下
復與江身合矣支流上跨以接龍橋橋南水灣爲觀音閣去
城東二里又東南五里則湘水南來直逼石崖下崖突立南

向曰獅子寨循寨足溯溪東入東北七里踰羊牯嶺抵狀元峰下有迴龍菴

二十一日菴東踰小山南一里至長冲東逼狀元峰麓又里許至草菴則狀元峰南一峰片插曰小金峰峭削似過之二峰各有路皆草翳余直東上二里抵狀元翠微間山削草合蛇路伏沉莽中漸東北轉三里直上踰嶺坳麻川遶其下麻川東大山橫亘屬灌陽界乃老龍脊也坳北峰下卽入九龍殿之峽子從坳南直躋峰頂峰甚峭窄凡七起伏共南一里上狀元峰則亭亭獨立矣但北面九峰相連南走與小金尙隔二峰峭若中斷不能飛度故道必由麓更上小金頂也頂北第三峰西北石臺如船首飛突凌空坐峰頂久之下返迴

龍菴

二十二日東行二里過九宮橋踰小嶺共二里至錦霄是爲峽口麻川江自南來北出界首截江以渡江深沒股麻川至此破山出名七里峽下又破山出名五里峽錦霄在其中爲陸行口過江湖東夾之溪入三里登山脊至九龍廟南北東皆崇山逼夾南麓卽所溯溪之北麓溪聲甚厲遂下山過觀音閣支流分環閣四面惟南面石堰僅通水東西北則舟上下俱繞之惜閣小不稱閣東度石橋循分支西岸溯流一里至分水塘塘以巨石橫絕中流南北連亘以斷江身祇以小

遊記

三册上
粵西一

六

穴洩餘波。由塘南分湘入瀉塘之北。卽濬湘爲支以通湘舟。於觀音閣前者也。遂刺舟南渡分瀉口入分水廟西二里抵興安南門出城西三里抵三里橋。橋跨靈渠。渠至此細流成涓。石底嶙峋。時巨舫鱗次以箔阻水。俟水稍厚則去箔放舟焉。

二十三日橋西有金鼎山。山爲老龍脊。由此至興安南轉海陽。雖爲史祿鑿山分瀉水而橋下有石底水不滿尺。終不能損其大脊也。上一里至頂。頂大止丈許。惟南面羣巒紛紛叢嵐霧中若聚米若流。火俯瞰其出沒甚近。下至三里橋西。隨靈渠西南去。已而渠漸直。南路益西路。右石山叢立。雨中迴眺。

遊記

三册上
粵西一

七

共十里。已透金鼎所望亂山堆疊。中穿根盤壑。多迴曲。無升降。又三里爲蘇一坪。東有岐可達乳洞。予先西趨巖關。其二里而出隘口。東西兩石山駢峙。路出其下。若門中闕。傍裂穴如圭。梯崖入其中。不甚敞。空合如蓮瓣。坐觀行旅紛紛杳杳。返由蘇一坪。東南行一里。溯靈渠東北。上一溪。東自乳洞來。注爲清水。乃東渡靈渠。四里過大巖堰。渡堰東石橋。轉入山南。小石山分岐立路。口洞呀然。南向遂西。向隨溪入。二里至董田。巨卮洞卽在其北。一里日暮不及登。乃趨東山。入隱山寺。寺後有洞門。南向高懸。水由下出。西合乳洞。北流水破。西北山腹出大巖。堰縛炬從寺右入洞。攀石崖上。石巉削。圯側。

下壁淵壁若裂深覓暗中水石無可着足乃出

二十四日西二里至乳巖下洞中洞上洞雨中返寺

二十五日東一里出山口支峰兀立處有菴草翳無人從菴左先循其上崖崖危草沒予攀隙入轉崖之東則兩壁門裂內裁一線剖宛轉嵌漏上夾參天離合殆十層起下夾直墜澗底俱凭臨千尺夾半兩崖復有痕受足肩倚隔崖手攀石竅無墜隕懼直進五六丈夾始東轉出由支峰坳脊北望觀音巖在對崖亦幽峭可喜昨從其前盤山轉惜未一至今不能更北也下山東南十七里至開洲爲湘西岸南十三里宿唐滙田東有大山巋然出東界上者曰赤耳山

遊記

三册上
粵西一

八

二十六日南湖湘六里爲太平堡東西山至是開成巨塢小石峰一帶駢立湘水東南十里飯廟角雙泉寺南卽靈川界南二里東南岐入山又二里度橋湘水有橋始此循左山南四里一石峰特立水中曰海陽山有海龍菴在峰南石崖半菴爲臨桂屬抵菴曰已酉乃下山自東麓二洞門繞北西入一洞龍母廟已圯卽從流水中行轉南水遂成滙深沒股菴下石崖壁立下臨深塘由塘南水中行東轉登山海陽山俱崿峒貯水水門二南平西出甚急東早門二下一二尺卽水滙其中深者五六尺山南水塘有細流東源李陵亦下此則此山尙在過脊北水俱北流惟爲湖源也滴源尙在海陽西

西嶺角

二十七日東望白面山南諸峭峰甚奇聞其上有讀書臺遂東北四里度雙溪橋又東一里尖峰在白面西望之趨乃登嶺北坳望山下水反自北南去北皆山岡亘絕無容流處由棘中循崖南轉捫隙歷塊上峰腰一洞南向內西裂龕窟吐納日月以爲卽讀書巖矣但平入三四丈漸隘其下路復巖蹇頗疑之出洞望洞東削崖萬丈插霄臨淵上一石飛突無所承極似巨鼠下躍然無路可捫乃裂棘攀條梯登懸石直至巨鼠崖下仰望巨鼠又有二小鼠下垂崖腰一線痕可着足下仍峭壁又東有巨擘一雙作接引狀手背拇指分合都

遊記

三册上
粵西一

九

辨至其處山腰痕絕不可前乃從舊路下至南麓詢耕者巖尙在嶺坳西當從嶺西下不當東上也乃從麓西溯澗而北則前所望溪從洞中出讀書巖在澗上登之洞西向高而不廣內垂柱擎蓋種種異觀三丈後卽北轉下隘不可俯視出過下水洞水卽從讀書巖下石穴湧出水與口平第見急湍湧流不見洞門也由海龍菴東南過季陵循過吞西行二里爲海陽堡堡前又分一支南下山與西山夾爲兩界水始淙淙南出隨水下一里則西谷中裂水破峽出又羅姑山與西嶺夾而成流者皆爲滴水源矣越之西南七里循大澗嶺上行忽有水自東南下搗成澗路隨之直墜澗底南越橋水自

橋下復搗峽中路不能從乃踰嶺墮然直下共四里出山口
又西南二里抵澗上西有銀獨山尖削特聳東南則石崖正
水口也

二十八日西南十里望西北五峰高竄頂平若臺可奪五臺
之名西五里直抵五峰南則亂峰尖疊什伯爲伍橫變側移
殆難更僕數其陽卽爲榕邨東南三十里有靈襟洞南二里
有陽流巖云西五里過上橋橋下水東北自叢尖山南西至
此又西南穿石山腋共三里過廖邨西北有山危峙爲金山
東叢角亭亭更覺層疊者龍潭山也又五里西穿石山峽則
諸峰分峙疊出離立獻奇石峰下俱水匯不流深者尺許淺

遊記

三册上
粵西一

十

半之諸峰倒插於中直如青蓮出水各欲獨上初兩大峰夾
道後又夾以兩銳峰道俱疊水中取徑峰隙令人賞無專接
但石皆廉利伴刃戟不免目慰足妬耳峰有名者曰雷劈曰
萬歲其間逸名者甚多共二里始出水磴平疇十五里直抵
兩山峽中山南北成門北山東垂石峰分岐起如削峻峰尤
亭亭作搔首態崖半裂透明隙惟南眺光列一線少轉步卽
失之南山又有石突綴其首人行於下者左右流盼又西爲
浮橋滴水北自皇澤灣至是極汪洋桂林省城東臨其上城
之臨水者東北爲東鎮門又南過木龍洞爲就日門又南出
伏波山下爲桂水門又南爲行春門極南爲浮橋門皆東面

臨江自北隅南至浮橋共五門浮橋貫江而渡寬顧僕不得宿城中逆旅

二十九日東出就日門從城下北行城上一山當面起石廊下插江中路忽穿山透跨下南北呀然殆天闕關津也西則因山爲城城以內卽疊綵東隅穿洞出正下臨江潭盤山壁透腋入又爲木龍洞洞亦自南穿北東開窟隙屢引天光外瀕江有路行者或內自洞行或外由江岸俱可北達出洞片石夾峙上屈曲架穹石色錯青紅似非本山石質不知何處後架此洞北闕成崖綴以飛廊前臨大江後倚懸壁憩眺勝莫踰此循城溯江北一里過東鎮門又北過城東北隅爲東

遊記

三册上
西粵一

十一

江驛驛東向當皇澤灣南下衝出驛北望皇澤灣二紅舫泊山下疑顧僕或在此舟趨問之則泊舟之山在松陰中乃廬山也其下大殿爲舜祠祠後卽韶音洞東臨江曰薰風亭余沿江登山上薰風亭由亭西下謁舜殿從殿後入韶音洞洞西向高二丈東透出約十丈洞東高崖巖絕小水匯其前幽潭嵌壁水自北塢南來石梁當洞架其上曰接龍橋坐橋上還眺洞門崖壁更盡崢嶸勢從此上躋宛轉石級間將至山頂一靜室窓櫺西向戶榻洒然室斗大而潔乃與靜聞鮮衣冠几指點西山甚適因急欲覓顧僕下山南循故道入就日門門內南半里由伏波山下出桂水門南一里經行春至浮

橋門始遇之。

五月初一日北抵靖江王府循王城北行登疊綵山山踞省城東北隅山門當兩峰間亂石層疊錯立浪花萼騰簇眩目土爲佛殿殿後一洞屈曲穿山背門南向高二丈深倍之北透小門忽轉而東闕洞前下瞰城東江水直激其足洞內石門轉透處風從前洞扇入寒吹凌人土人稱爲風洞石門北向當東轉之上仰見石板平度上透圓竇若樓閣再駕子與靜聞分道趨各會層樓之上其處東復開隙垂乳列於西乃從圓竇中墜空下出後洞北躋磴上南越洞頂遂登絕巘則越王壇也是爲桂山上皆石萼蠢發一石峰前支起謂之四望山西一石峰高與此峰並峰半有洞高懸望之呀然中空亟下仍從風洞出寺由寺西坳中復登西峰峰半洞東向透峰腹而西徑十餘丈高十之四由其中望東西洞然惜絕頂地少側未能徼矚全勝耳是名于越山洞西墜壑下極險峻仍東下至寺有大道北透兩峰間抵麓西行里許又一洞倚山北向遂拾級以登其下先有一洞高可丈五寬廣盤曲多垂柱界竅分歧土人以爲馬廐散卧馬匹令人氣阻由西南躋級更上從洞門入透隙而西外裂重門內駕層洞既下西行見峰頂洞門西墜處危峽孤懸下有長垣環之仰眺不得端委則藩府別圃也遂北轉至北門門在兩山聳夾中門

遊記

三册上
粵西一

十二

外兩岫山俱峭拔卽爲華景竇積衆勝云折而東南出桂水門抵慶真觀北渡江入玩珠巖卽伏波山東麓石壁下嵌重江裂隙兩層上縱下橫縱者高盤入頂無級可階橫者下卧波上下石浮做爲臺覆以欹石石柱下垂覆簷外直抵下石不接者僅寸名伏波試劍石後壁紅白紋若纒圖宕三疊俗當其首故曰玩珠雙紋後內復裂隙直抵豎峽下垂柱之西石臺中坼橫石以度更北穿旁竇下臨淵碧無底南入山腹有光西轉北達前門是其輿境矣但石色波光俱不若外巖玲瓏映徹也登涯由浮橋返寓按圖志以索桂林諸可游者初二日東出浮橋門渡浮橋又東度花橋循山北轉山峙花

遊記

三冊上
粵西一

十三

橋東北七星巖卽倚焉巖西向下有壽佛寺寺左登山一亭翼然迎客曰摘星石崖橫竊其上僅可置足然俯瞰城堞諸山甚暢亭左佛龕當巖之口入其內不知其爲巖也推龕後扉入歷級上約三丈忽轉而西北豁然中開上穹下平多列筍懸柱爽朗通漏此上洞也是爲七星巖從其右歷級下又入下洞是爲栖霞洞洞雄拓門亦西北向仰眺崇赫洞頂橫裂一隙石鯉自隙中懸躍下向首尾鱗鬣酷肖旁盤結幡蓋五色燦爛西北層臺高疊懸梯而上曰老君臺由臺北向洞若兩界西行高臺之上東循深壑之中由臺上入一門直北至黑昏處垂石上穹無際下陷成潭傾洞峭裂忽變夷爲險

返下臺仍至洞底導者携松明前驅循臺東壑中行始見臺壁攢雲錯綺備諸幻相直北入一天門石檻垂立僅度单人旣入穹然高遠左橫列石攔下深黑杳不見底云獺子潭卽老君臺北下墜處至此高深易位又成一境內又進兩天門路漸東北轉崖石詭變多所彷彿導者行急予強留諦視顧此失彼然予所欲睹者正不在種種規擬也又踰崖上東有潭淵黑如獺子宏廣更過之是名龍江下與獺子潭通又北行東轉過紅白瓊鳳凰戲水穿一門出忽見白光一圓內映

沉碧遂東出後洞水自洞北環流南入洞中想下爲龍江者小石梁跨其上宋相曾布帥桂時所爲是名曾公巖蓋與棲

遊記

三冊上
粵西一

十四

霞一洞潛達兩門各撞耳予竹立橋上見澗中有浣汲者予訊水從西北來可溯入否其人謂水穴之上更西北可深入數里名勝較倍棲霞水穴則深淺莫揆惟寒辰肅月爲可涉子卽倩其人爲導其人歸取松明子隨之出洞右得慶林觀期觀中炊以待遂同導者入仍過紅白瓊始由岐北向則佳偉殊麗繁錫嘉稱最深入遇潭淵杳當橋澗上流導者阻進謂前去數日鮮竟游展抵此從無入者况當夏漲襄陵可嘗不測乎乃返計自棲霞達曾公巖徑約二里復自巖口出入盤旋三里洞之觀止矣飯慶林觀望來時所見搔首喟卽立其東從間道出其下則墜下西開一窾圃者廬之北復有巖

洞種種遍會公巖上下左右殆難數計也循七星南麓北向
草莽中連入三洞計省春當在北可踰嶺達遂北循嶺坳微
徑里半至山頂石骨峻嶒不容着足石隙少開處棘刺沉巖
愈窮攀躋然片石布奇擊辨分異遠望掩映愈披愈出令人
心目勞遷又里半踰頂下復得鑿石之級級盡卽省春巖巖
三洞排列俱東北向最西者鸞雲上飛有倒石下垂如枯槎
老麓西入南轉洞漸黑惜無居人不能索炬入洞右旁通一
竅以達中洞甚深難遠入洞前垂石亦作槎勢又透一門以
達東洞東洞垂石愈繁洞亦旁裂中有清泉下注寒碧成潭
由洞前循崖東行洞上聳石如人立獸躡東則危崖亘空仰

遊記

三册上
粵西一

十五

望如甕其下拖劍水縈之卽癸水也源發堯山抵山北麓西
出葛老橋入滴水時子轉至山東隅仰見崖半裂層竅者三
乃披莽隙梯懸累上旣達一竅西通中竅中竅卑伏首不得
伸從外橫度有同臺榭不由中與竟達第三竅穿隙入後有
一龕意闕其前中懸玉柱柱左又有一龕圓頂平座前正對
玉柱子同靜聞分踞柱前窻隙下臨危崖行道者仰望無不
徘徊忘返二邨樵仰睇久之亦躋登謂中竅之上尙有一洞
甚宏欲爲子攀躋上求子乃下倚松陰從二樵仰睇處反睇
二樵在上懸枝索級終阻懸漢莫能階升也仍西入省春出
西洞西又得二洞門北向再西者高五丈內稍下西轉雖漸

昏黑勢崇宏愈甚以無炬中阻左崖大書深刻五美章乃張
南軒筆惜無知者洞莫定其名或以爲會仙巖彈丸巖巖壁
宋蒲田陳黼題則渚巖洞也洞之西拖劍水自東北直逼崖
下崖愈穹削插霄凭淵良竭雄偉石梁跨水西渡已爲七星
山西北隅名彈丸山云由其西南度葛老橋東望崖巔有洞
高穹上下都極峭削南有一崖架廬並東向登山山下一剎
與壽佛寺七星觀南北鼎列南爲七星觀東上卽七星洞中
爲壽佛寺東上卽棲霞洞北爲此剎東上卽朝雲巖也仰攀
磴數百級入巖巖亦西向在棲霞北洞口高懸內北轉窅危
愈峻嶽僧太虛駕閣洞口絕壁下瞰江城遠揖西山獨踞勝

遊記

三册上
粵西一

十六

槩遂停宿因問上巖道太虛曰此巖高聳雖予近在崖右曾
無級可登約其洞之南壁與此洞北底隔止丈許洞內可鑿
空以通洞以外更無懸杙縲級處也憑欄北眺洞爲石掩反
不能近矚惟洒髮向西山歷數諸峰耳西山自北而南極北
爲虞山稍東爲東鎮門山再南爲桂山之木龍風洞最南爲
伏波山此城東一支也虞山之西極北爲華景山稍南爲馬
留山再南爲隱山最南爲侯山廣福王山此城西一支也伏
波隱山中爲獨秀其南對踞水口者爲漓山穿山皆漓江以
西故曰西山云

初三日追錄遊記於巖閣薄暮乃返寓

初四日北二里至靖江王禮懺壇入藩城北門門內池水一灣南遠獨秀北麓由池西南經獨秀西麓至靖藩精舍主僧爲予言君欲登獨秀須先啟王期以十二日可登乃出藩城西穿榕樹門門北向大樹正跨其頂巨木虬根盤鬱間闢昔爲唐宋南門元時拓城於外門久塞嘉靖乙卯大將軍周于德舒壅閉而門之前匯水爲大池後卽門頂巨石疊級分東西上亦有兩大榕南向東西夾之上建關帝殿南面臨池甚爲雄暢殿西下卽大將軍幕府益西循城南一里西出武勝門北溯西江又一里達隱山山北倚馬鬣西接侯山四面有六洞環列東爲朝陽洞寺在其下洞口東向下層通水

遊記

三册上
粵西一

十七

上層北闢一門就石刻老君像今稱老君洞山北麓下爲北牖洞洞東石池一方水溢麓下匯而不流外竇卑伏而內甚宏深前有巷由巷後披隙入洞圓整危朗後復上盤一龕左有一窻西闢石柱旁列不通水竇其北崖之上爲白雀洞在朝陽後洞西門北向入甚隘前有線隙橫列上徹天光漸南漸下直通水又西爲嘉蓮洞亦北向與白雀並列洞分東西兩隙俱南向下墜洞內時開小穴彼此相望數丈輒合內墜淵黑亦抵水又西過一石隙西北有石平度錯夢中絕勝瓊臺乃南轉爲夕陽洞西向洞口飛石中門爲兩門左一側壑匯水由水竇東通於內右有曲穴北轉內甚婁暗下墜深潭

蓋南北皆與水會焉。又南轉西南山麓爲南華洞。洞南向勢漸下。滙水當門。可厲入。深入則六洞同流。五洞之底皆交連中絡。惟北牖則另闢一水竇。初不由洞中。通云。聞昔唐宋西江東滢榕樹門。隱山滙巨浸中。是名西湖。其時諸記勝者。俱云乘舟載酒入。今則西江南下。繁厥桑田。甚損浩蕩。觀子初至朝陽寺。月印上人導由殿後入東洞。穿老君側。出山北。西過白雀嘉蓮。皆北隅洞也。南過西隅夕陽洞。又南盡東轉。過南華。則南隅之洞也。子欲從此涉水入。月印謂秋冬水涸蟲蟄窮幽。無所憚。今漲甚。深處莫測。蛇龍窟宅。其中老僧不敢導。請北遊北牖。乃東過西湖神廟。北轉過朝陽。踰隱山。東北

遊記

三册上
粵西一

十八

隅。其處石片分列。如張幙。如裁雲。如透月。幻極紛紜。潤以采澤。不啻削芙蓉。綴蛺蝶也。又西入北牖。菴子與靜聞分踞北牖。河西窻。內外周覽。久之。出飯菴前松蔭下。復抵南華。遇一田叟曰。此水竇。旁通雖深淺疑迷。子獨熟過其內。君欲入。明晨當炬導。予強之。卽入。曰。松明未辨。乃以詰旦期。予遂南過武勝門。及寧遠門。度橋而南。西江走其下。東分兩支入漓。子東南循西江南分派。一里抵漓山。山之東卽漓江也。從山西麓轉其北。則漓水自北。江水自西。俱直搗山下。山怒崖騰。力扼其衝。由磴上盤山腰。得雉巖寺。寺後躋石峽。躡青蘿閣。旣

冥。下宿巖寺。

初五日客序遷除遂成午簡令顧僕入郭市蔬酒出坐雉巖亭以蒲酒雜黃白酬節况復散酒青蘿閣時方禁龍舟舟人各以小艇私擢山下鼉鼓雷殷迴波陷日既暮下山西入一洞洞在山足門西向高穹中平上鑄樂盛洞三字出洞東循雉巖崖麓沿江東憩其東隅一石上自山巔下插江底中剜穴透虛深二丈高三丈若闢門然江流自北滙其中涉其南透崖以上卽爲干手大士菴予濯足弄江抵暮上宿雉巖雉巖者統志以爲卽漓山在城南三里陽水南支經其北漓水南下經其東東有石門嵌江西有穹洞深入南有干手大士菴俱列其足雉巖寺高懸山半北迎兩江頽浪飛檻綴崖側

遊記

三册上
粵西一

十九

影澄碧寺西爲雉山亭南爲雉山洞洞外卽飛崖斗發裂隙逆峽直自巔下徹旁有懸龍矯變石色都異前大石平湧爲蓮臺臺右根與後峽相接處下透小穴入西向臺墮摩崖登臺則懸龍架峽正出其上昔有閣曰青蘿今移置臺端登之不知其爲臺也然勝概麇集不以閣掩是山正對城南爲城外第二重案山北一里曰象鼻山水月洞南三里曰崖頭淨瓶山荷葉洞俱東逼漓江而是山在中較高志遂以此爲漓山范成大又以象鼻爲漓山二山形頗相似但雉巖石門不若水月曠然巨觀故遊者捨彼趨此然以予權之灑江午向三山不特此二山相匹崖頭西北山脚石亦剜空嵌水跨成

小門其離立江水衝合中三山俱可名滴也

初六日南下山二里過南溪橋南溪之山高峙橋東南溪來自西南直逼西麓繞山東北入瀉去白龍洞在山椒洞門高張西向臨溪下廣列崇殿仰望不知爲洞由殿左透級上得旋室如層樓內有龕自然爲一洞絕勝處從此北向東轉遂成昏黑先是買炬山僧謂洞內可竟達劉仙巖不必更出及篝火入中寬敞多岐先極其東隅上躋一隙予以爲劉仙道也竟途窮莫進又南下一窪支竇旁午予以爲劉仙道導僧謂此乃護珠巖道嶮巖莫逾躑躅杳冥中不若出洞平行爲便乃下山至橋望白龍北復有洞盤空予渴赴劉巖遂從橋東循山南東轉南面一崖層巖彌聳將捨之忽山雨至奔烈巖下躋隙坐飛石上雨簾外窺內映乳幙飄飄有餐霞想久之雨止下巖轉其東至劉仙巖巖與白龍東西分向有觀在巖下從觀右登級先穿一門西入卽踰其上復透門出得一巖東南向又左由透門之上再度而北亦開一巖巖前懸石甚壯當洞門爲屏若垂簾然予至巖卽周覽各竇詢與白龍潛通處竟不可得乃知白龍所通卽避雨巖下竇導僧所云護珠巖是也

遊記

三册上
粵西一

二十

初七日由觀左登穿雲巖巖在上巖東南絕壁下亦東南向後與左右分穿三竇而左竇旁透洞前洞東爲文昌祠由其

前東過仙人足蹟蹟北更上卽爲仙蹟巖巖在穿雲東北上巖正東隅洞口亦東南向外甚危亮內乳柱倒垂界爲兩重若堂皇之後屏列窻櫺分內外室者洞後穿竇兩岐俱不甚深奇在玲瓏殫致返至觀南二里出十里鋪鋪在關雞西邵往平樂大道又東向岐路入一里北望穿山高懸隔江空濛雨色中再前望崖頭北隅梳粧臺下飛石嵌江剝成門闕遠望較水月似小與雉山石門形勢倫比然急流湧其中蕩漾尤異共一里東至崖頭廟崖頭在雉山南瀉江西合陽江於雉山又東會拖劍水及瀉江支水於穿山奔流南下此山當其衝山不甚高而屹立扼流有當熊勢北崖有臺曰梳粧下

遊記

三冊上

粵西一

二十一

卽飛石懸嵌中剝成門處崖突波傾不能下瞰但見迴瀾素波觸石奮出砉然送聲至座坐久之返廟中由其後入一洞門西南向穿門歷級下其後呀然通望一石肺乘空色正綠是爲荷葉洞穿葉底透山東北卽通望口也瀉江復縈其下由葉前南下東轉深昧中勢穹然不及索炬入山東北隅石崖插江山稱淨瓶以此須汎舟沿流觀之其上莫窺也仍出大道十里鋪經白龍洞北隨溪探前所望白龍左洞則元巖也巖東向洞門高聳下峽由南腋東入上洞東登必由北與俱崇深幽邃無炬不能遐歷洞前乳柱續紛不減白龍上鐫元巖字甚古出洞入寧遠門返寓

初八日北出安定門東轉北入支徑登劉巖山有菴在山麓後爲劉巖洞洞西向東下淵黑由洞右躋危級上至明月洞洞高綴危崖半門亦西向東入呀然然昏昧莫辨出洞下崖半循崖少北復一洞西向門紛綸高懸僧伐木縱橫洞前無由上躋乃梯登以上一石當門樹屏由左透隙則宛轉玲瓏踰石脊東下穹然直透山腹闢門東出外臨層崖內皆乳柱充隙徑竇迸裂北一徑高穹下墜東轉昏黑亦有門東出閣不復下此洞東西透豁然有脊有門中界之不若穿山豈緣中隱南峰諸洞擴然平通下望明皎內無餘奧也下山西過北門門西峰當面起削山爲城循山北麓轉至城西北隅下

遊記

三冊上
粵西一

二五

下盤層石上削危城當卽志所稱始安嶠也而北門在兩山夾中東西峰各峭壁起因依爲門鎖鑰甚壯予少憩盤崖上旋入北門南一里至桂嶺碑側西向瀕城復得一山爲華景洞洞東向前對大池後所倚山則亦因爲西城者洞前巖平朗上覆外敞後穿穴爲門分爲三南入者窪暗而邃西透之穴昔穿城外因爲門今已墜石塞北轉者上出巖前遂西登城陴循南而升已從石萼叢錯中攀躋山頂頂卽竇積山志稱竇積與華景相連上多詭石怪木然今又名卧龍山想以武侯祠易名耳下山二里抵寓

初九日出文昌門乃東南門也正對南溪山南過石梁梁下

卽陽江北分派東轉一里抵石山南麓三教菴菴後爲古雲崖其山亦稱漓山粵人呼爲象鼻山山東南隅亦有洞南向循崖東北抵漓江盤山溯江從右崖危嵌中得一洞北向曰南極洞出其前直至西北隅爲象鼻巖水月洞貫其下飛崖自頂騰踰北插中流東西俱高刺成門陽江從城南西來流其中而合之漓上空明如月下復內外潑波而插江之崖下踰於水上屬於山中垂外掀正作捲鼻勢水洞之南崖半又闢陸洞其崖亦自山頂東跨江畔中剏竅若長廊直透水洞上北踞竅口下瞰水洞適有漁舟泊洞中崖石間令棹子達出洞外復穿入洞內水陸勝觀一時兼盡乃南行一里渡漓

遊記

三册上
粵西一

二十三

江東岸又二里抵穿山下山西與鬪雞山對鬪雞在劉仙巖南崖頭山北漓江西岸瀕江之山也東西夾漓怒剋鼓距兩山當合名鬪雞特東山透明如圓鏡故更以穿山名之山之西又一峰危立初望竟爲一山上有豎石至其下始見豎石下剖直抵山根亭亭獨立山固以脆薄靈舉見奇土人名爲荷葉山殊得之穿山北麓嘉熙拖劍水直激崖脚循山之西南與漓合予始至其北隔不得渡望崖壁危懸洞門或明或暗紛紛錯列卽渡亦不得上乃隨溪南行隔水東眺則穿巖已轉不睹空明山側成峰尖若豎指矣又以小舟東渡出穿山南麓北面而登撥草尋磴一南向巖最高倚半山疑卽穿巖

乃其中乳柱中懸有曲折致東入漸窪黑水匯於中知非穿巖乃出由其西上躋始得崇巖廓然平達山腹徑山十餘丈高濶俱五六丈真徹望澄明一空障蔽攀外崖東轉又開北向一洞列並穿巖而後不中通其東尙有三洞門下可望見至此則峭削絕徑而穿巖南口上復疊一洞後亦不透然內多重幃殆爲穿巖架閣也仍東下匯水巖巖東復有南向洞內亦支竅西入隘黑無奇遂出西渡荷葉山下北過營家洲度浮橋而返

初十日抵王城後門登戲壇訂至僧獨秀期更於十三日

十一日出浮橋門過花橋問龍隱巖道爲橋東之南崖乃來

遊記

三册上
粵西一

二十四

時所過夾道兩山北卽七星南卽龍隱至是始得其詳橋上南眺龍隱與月牙並列東崖第月牙稍北度橋循山其路易通龍隱稍南須從橋下涉江上其大道則自山北端拱石南踰嶺坳循隱真而西又從怡雲北轉始達予欲并眺端拱石人遂自橋東直走嶺下南上平瞻石人又南下得一大塘塘北循山西轉崖石俱盤削飛突里餘抵山西南隅峰益嵯峨疊巽中空外聳上若鵲橋度虛攀隙登則怡雲亭廢趾也由其上轉罅梯空穿石罅上躋石片片懸綴側爲透夾平爲架橋如上竿轉塔無不曲折匠意下至怡雲石卽龍隱巖洞門西向高穹廣衍頂石平覆洞右近口復垂柱環爲層龕重洞

接影深流此爲最勝出巖仍從怡雲返花橋南沿西麓隨流
歷磴半里入月牙巖巖西向南卽龍隱第此則級石成磴彼
則斷壁斗崖路殊逼塞耳巖上環西缺其口內不甚深政以
圓缺分明有同鈎月下照清冷亦幽境也由由街北過七星
餐於朝雲巖北度葛老橋覓屏風山或有以黃金巖告者謂
去城東北五里乃買買東北趨三里過問負擔者指邨北之
山曰此卽是至邨問之仍不知也及抵山東麓則削崖列嶂
平展危懸已轉北麓得洞門如峽山頂高穹兩崖濶五丈高
十餘丈初南向平入十丈之內少東南轉忽明穴上開自下
望之殆蜃市重樓矣從此高躋又十餘丈抵明穴之口探嫩

遊記

三册上
粵西一

二五

松栝兩崖開籬別巖得程公巖三大字西有記一則蓋鄱陽
程公崇寧帥桂時所開志載屏風巖一名程公至此乃爽然
自釋也遂西向歷級上登穴口其內巖頂之石層層下垂極
爲雄峻將至出穴處地少平坦與有大石幢盤疊至頂色碧
形詭何設奇至此出穴而西山廻峽轉石骨森豎下卽盤峯
成窩窩底一洞北向寬徑西南下抵窩入洞洞不甚深卽西
踰窩出兩石峰駢枝並起一爲石工剝蝕殆盡一猶亭亭孤
立從石峰東更西南三里已出葛老橋西於是循朝雲七星
西麓度花橋紛傳流警薄永郡省城戒嚴門已鍵亟馳過浮

橋門尙半啟得返寓

十二日西出麗澤門門外巨塘滙水水自西北城角馬槽過脊處南抵振武門北入陽江石梁跨之曰涼水洞橋橋南北塘中蓮花盛放坐蔭橋樹下殆不能去予欲覓中隱山乃南至振武門西度定西橋一里忽路右一山有洞呀然卽北趨其下前有古寺拭碑讀之西山也洞門南向東又裂石自峰頂下跨成門乃捨洞趨之其門南北豁然亦如雉山象鼻但彼急流中貫巽於此之外遠澄潭耳然外跨之石欹疊錯出尤露穎異遂先遶其東抵山北北向亦有洞窈洞而南橫透山腹竟與南洞貫徹中有夾門垂柱不似他洞徹望竟目也出南洞洞左疊磴嵯峨循之北躋峰頂石皆峰嶸攢簇中旋

遊記

三冊上
粵西一

二十六

爲平凹長若溝洫光滑特異下至南洞前始東入石門門乃片石下贊中門高闕旁通衆竅故以小巧見奇望西峰石亦聳列從寺後西歷其上歷級南下峰嶸中西循大道三里聞木陵邨有巖曰佛子遂從西北岐入二里石峰在侯山東麓洞門高懸北抵巖下巖之東二洞南向最東者敞而不深稍西則洞門側裂外垂列乳中橫一屏屏後深峽下墜屏東西俱有門可下由峽中北入其竅旁裂漸隘乃復出西上入大洞洞南下北上穹然高透頗如程公以松枝拭右崖所題則宋呂愿中題中隱呂公洞詩也後署云假守洛陽呂叔恭遊中隱山無名洞客有言此洞因君顯當以呂公名之因書五

十六字鑄於壁。始知佛子巖卽中隱山。呂公洞也。由是北躋後穴。內雲翼倒鸞。與洞俱上。不作逼隘。觀穴口高朗。天過程公後穴也。北出口。石磴二道。一東北下山麓。子先從其下者。北向之麓。皆崆峒幔覆。外有倒石界而爲門。爲窻。內蜿蜒旁通。繞若行廊。複道。此下洞以幽奇勝。旣復上。從西北磴。復得一洞。洞北入南穹。擴然平朗。頗似穿巖。南一石聳立如臺。上有石佛。不知其自來。佛子巖所由名矣。前有巨石柱如屏中峙。東西界爲兩門。西竅廣正。自下遠眺。此竅直透北山。東則偏隱。無所睹。竅外循崖東轉。又闕一門。下臨中洞之上。爲關帝座。仍由洞北東下。穿中洞南出。西循山。又開南向一洞。與

遊記

三册上
粵西一

二七

中洞並列。由其西攀磴上。又有洞南向。雨漬磴滑。捨之下山。東南半里。飯木陵民家。民謂西南侯山下。有銅錢巖。可透出前山。北向趙家山。亦有洞可深入。又有陳搏巖。頗奇。子念諸峰不能徧歷。侯山爲衆峰冠。其巖不可交臂失。遂由中隱舊道。西一里。抵侯山廟。廟後山麓漫衍。蹈水披叢。芒不得洞。但見有級上躋。鼓輿登絕頂。山前行者高呼。日暮不可登。乃遙望大道南。削峰東轉。有洞東北穹立。望之趨。南去里許。抵其下洞。高倚山半。前有渚水。匯潭潭上。拾級攀荆。遂入洞。亂石堆洞門外。外高內深。歷石級西南下。直墜洞底。水涯淵漠。內望一石橫突出。下有側崖。嵌水裂隙。受趾。子抵突石下。畏崖

仄峭滑乃出下山轉出其東南山背復有門漚水卒莫定其爲何洞也其處西峰駢聳無侯山之高而峭拔過之暮歸急姑留爲後遊二里南出大道路旁夾道之山上有竅東西透空與佛子穿巖正等亦不及入執途人問前所入北向洞何名則架梯巖一名石鼓洞也紛傳城門已閉踴蹶東五里過木陵分岐處已昏黑又三里抵振武門將闔矣側身入始從容行街市中

十三日入靖藩城過獨秀西菴王僧入內宮禮懺登峰約復移之他日乃出就日門過木龍南洞由其下渡江還望木龍下層復有洞濱江穿麓滌流可愛上江東崖溯流北半里入

遊記

三册上
粵西一

二十八

千佛閣前有大榕一株問所謂辰山者俱莫曉隨大路東北五里堯山在東屏風巖在南獨辰山茫然莫辨忽北望一山去不一里穹然有洞洞口一石當門赭色斑斕彪炳有異問負芻者曰老虎山也予謂靜聞何不先了此後覓辰山遂北一里抵山下望高先登由洞口穿入其內天光自頂四射由下北透其腹再入重門支峽後裂層皮上懸俱莫可度南向重門內攀崖上躋遂履層樓徘徊未下忽一人來候洞前下問之曰洞名獅子一名黃鷗巖山前三洞下曰平地中曰道士其此巖爲三出洞見山頂石叢參錯乃循路上躋石片片水稜鐵色下嶺石稜就夷棘道俱險前候者復趨上引予

左入道士巖巖亦南向在黃鸝東稍下洞前壁左右各鐫詩
拂讀詩序是山卽辰山也穿洞東側門出東向下山東北一
里飯所候者家主人姓王字慶宇訂予宿此東炬肩梯前導
趨辰山北麓爲青珠洞遊洞北向裂峽上並山頂內界兩層
始南入十丈許攀崖上稍西乃豎梯向北崖上躋既登北入
峽中五丈餘透出橫峽峽東西橫亘上高俱不見頂東行四
五丈漸闕生光一大石柱中懸繞出柱西峽又南北裂南入
臨洞底北出正臨洞門上洞門中列二柱界爲一門兩窻延
耀內射正當圓柱子詭爲奇導者曰未也轉進橫峽口又西
行四五丈有竅南入甚隘悉去衣赤體伏地蛇行以進其穴

遊記

三册上
粵西一

二九

長三丈大僅如筒又曲折中多懸柱時從遊兩人以炬先入
次及子度稽一時過隘洞復穹然上崇下陷俯躬南降垂乳
紛列迥與外別導者曰未也又西踰一梁梁橫南北若闕越
梁西下石孔愈奇西窮復轉北上蒸縝滿眼彌轉彌勝此洞
與山南黃鸝巖正南北相當然一山皆空環峙分門者尙多
也北向開洞門者三此爲中東西二門俱淺東向開洞門者
五北爲高穹中爲三曲狗頭南爲道士東峽和合小巖而三
曲最深南向者三卽平地道士黃鸝也志稱辰山有洞三級
第指其南耳惟西面子未之竅出青珠洞過北洞一東麓洞
五循南入平地巖初入欹仄側身緣東隙而上內境旣穹外

光漸闕，火炬已棄。北隅暮色赤上，乃出東北返王慶宇家。

十四日別慶宇，東北三里過矮山，山在堯山西澗水東北，聳一枝如附拇指，乃桂林石山最北首峰也。山南崖削立，下有白巖洞，洞南向，三竇旁迤，內垂石如蓮葉捲覆，下多透漏，其後少窪，下輒復平曠，轉西入數丈，仍南穴，天光出洞，東有菴。於是東向溯小溪二里，抵堯山西麓，又二里爲玉虛殿，山廻成塢，西向開洋，由殿右轉入山後，南山夾澗，南向溯澗半里，踰澗東上登嶺角，益東北上，升降三四，又二里始登堯山絕頂，此中石峰森立，間得此土山，反以爲異，故堯山名特著。山之東石峰叢合，有溪盤遶，其間當卽大壩上流出，廖家邨西者也。下山仍返西麓，南度橋五里，出堯山東南塢，其南石峰森森，東南一峰尤兀突，益東南馳松篁間，出林夾右轉石山而南，卽鐵峰山，頗似獨秀，下有巖洞不可入，西南二里抵冷水塘，小橋跨流，急湧西南去，一邨依山逐澗，亦幽棲之勝。邨南石峰如屏，東西橫亘，從西嚮望之，薄若立指，由其腋東轉南山之坳，出山南大道，直西馳共三里，過萬洞寺，則石山四開，寨山兀立其中，望寨山東崖，穹然壁立，而不覩其徑，循山南抵西麓，乃歷級北上，當寨山西北隅，崖開一罅，上架橫梁，踰梁入東貫山腹，已在嵌室內，遂托宿。

遊記

三册上
粵西一

三十

十五日曉起，徧觀洞中，其洞西北東南前後兩闕，中通隘。

容一人由西麓上山腰透入飛石下旋躡其上卷石爲橋以
達洞門門西北向門內洞界爲兩南北並列北洞後卽通隘
秀腹處隘長三丈旣入卽寬闢爲巖懸乳垂蓮紛綸左右東
巖上下俱極崇削下亦有深洞路當山麓南轉始得東上予
旣晨餐西北望黃金巖甚近亟趨之不復東尋下洞也下西
麓過竹橋由邨右西北行三里抵巖之陽山骨立路北下卽
裂爲洞南北交透前卑後峻後門之半石橫架空中門界爲
二由洞內上躋北出架梁之下俯瞰北麓拖劍水直齧其下
土人俱指此爲黃金巖予南下出洞西復有洞南向高裂深
入不透僅如重峽已從西麓北轉山西北垂亦有洞西向中

遊記

三冊上
粵西一

三十一

穹不甚深透對面有東向一洞與此相向若門廡對列洞內
分四支如十字東北二門外透而明西南二峽內入而黑然
西北皆懸崖上奧東其所入南乃深潭也拖劍水在東峰北
抵此洞前轉北循山當洞有橋跨之橋內漚爲池亦山叢水
曲之與出洞不知其名問汲水池中者曰此洞不知何名上
更有一洞可躡躋也亟披箒透崖上南北兩石屏並立起微
徑界其中甚峻洞峙南屏後門亦東向不甚宏洞有舊鐫黃
金巖三字可辨是洞始爲黃金前乃其東峰之洞也出門左
見北屏內峽有路上躋爲宿莽所翳雨深蔓濕不甚置足予
強登之南轉卽上洞也門北向門外棘蔓交絡縷分之乃得

入入則窈竇外通重樓三疊皮閣之石板裁蟬翼薄然無級隙可攀惟中洞之內窈竇玲瓏懸隙宛轉可穿而上第甚隘層折難舒於是解衣蛇行遂出上層平度閣上踞洞口飛石高呼靜聞乃下廻望黃金巖西北麓諸洞尤多乃隨拖劍水遂出北麓又得北向洞二西向洞三遂西趨屏風山將渡拖劍水望屏風黃金兩山中又南界一山下有洞北向迂道從之洞亦旁分兩門一北向一東向西有級上躋再上級崩路削又有洞北向乃下抵西北隅則窈透中空之洞峽連闕與黃金西北同正西一洞高穹層裂紛拏傑張此又以雄武見奇非尋常窈竇也問之土人知爲飛石洞遂西渡石堰一

遊記

三册上
粵西一

三三

里入程公巖北二里仍飯王慶宇家西再探道士巖諸洞過屏風西麓至是已四周其山入浮橋門浮橋共三十六舟云十九日始定陽朔舟

二十一日日中乃行南過水月洞東又南雉山穿山鬪雞剝頭有石門淨瓶勝丹隔洲以行不能近悉去省已十里崖頭之南江流浩然自放又東南二十里過龍門塘南岸有峭壁峨中峰最高處南北透東五里橫山巖突立江右又東南十里江右削崖屏立南五里至碧崖巖巖南石峰隔江排立起橫陣南天上分危岫幾埒巫峯五老扼江使東江流囑其北

麓怒濤翻壁赤壁采石穴厥雄麗崖間一石紋黑縷白章成
泛海大士曰沉香堂其處南雖崇深極致北岸猶夷豁共五
里下寸金灘南轉入山岫江自是左右皆石峰噴吼爭奇炫
詭入峽下斗米灘五里爲南田站當臨桂陽朔界山遂轉峽
爲塢四面層巒僅受此邨迤南田山色暮合舟人夜棹不休
江爲山所泥俛南俛東盤穴透崖凡二十五里抵畫山月猶
未起山隱空蒙中又南五里爲興平月從羣峰東隙出舟泊
侯曙漓江自桂林南來兩崖森壁廻峰中多洲渚分合無翻
流之石直瀉之湍故舟行屈曲石穴間無妨夜棹第月起稽
緩聞行明止未免悵悵

遊記

三册上
粵西一

二十二日蚤起曉月光流奇峰合棹南三里爲螺螄巖一峰
盤旋上轉峙江右與平水口山也又七里東南出水綠邨山
乃歛鋒子掩蓬就寢南三十里則龍頭山復錚錚骨立而陽
朔四圍又攢作碧蓮玉笋世界矣陽朔北自龍頭南抵鑑山
二峰巍峙當漓江上下流中有掌平地乃東面瀕江以岸爲
城而南北屬於兩山惟西面叠垣爲雉城西山最近者爲來
仙洞石人牛洞龍洞諸山通省大道從之蓋陸從西水從東
也其東南門鑑山下則南趨平樂水陸並道正南門亦西北
轉通省道直南爲南斗山延壽巖旁建文昌閣無徑他達正
北卽陽朔山層峰駢峙東接龍頭東西城俱屬於南隅北則

以山爲障。竟無城及門。東北一門。在北極宮下。僅東通江水。北抵儀安祠。讀書巖。然俱草塞。人罕行其徑。惟東臨瀉江。開三門以取水焉。予上午抵城。入正東門。從文廟西入縣治。蕪寂殊甚。縣南半里有市橋。橋下水西自龍洞入城。出橋東。卽懸流注深壑。壑大四五丈。四面叢石盤突。是爲龍潭。但飛流下搗。不見下流所溢。潭東卽城。大江流城外。蓋地穴潛通也。橋南鑑山獨聳。一名易山。卽南借以爲城者。東麓有鑑山寺。倚山臨江。通道置門。卽東南門也。西麓則正南門。予初抵北麓。覓道上躋。南東二面。就崖爲城。惟北面在城內。有微級。久爲莽棘翳沒。乃攀條捫隙。直造峭壁下。莽徑并絕。復出其

遊記

三册上
粵西一

三十四

旁躡巉石盤旋半空。終迷所欲登。乃下時。顧僕守舟。期東南門外。於是南經鑑山寺。出東南門。覓舟不得。渡江東一里。至白沙灣。舟泊其南。乃下舟。白沙灣去城東南可二里。民居盛於城。有河泊所。其南三峰列峙。最東一峰曰白鶴山。江南抵其脚。曲而東北。抱此一灣。沙土雪潔。其東南一溪。南自二龍橋來。北入江溪。在南三峰之東。逼白鶴。西趾出溪東。又有數峰。自南趨北。界溪入江口。最北者書童山也。江以此乃東北逆轉。

二十三日。從白沙依江東北行。一里南渡江。已出東界山之東。江東北岸有高峯。盡四尖起。特障江南。趨旣渡。陂塘高下。

林木翛然有澄心寺可憩東一里過穆山邨復渡江而東循
四尖南麓趨出其東山開目曠奇致愈出前望東北又起一
峰上分二岐東岐若僧帽垂空西岐尤高豎四尖東枝銳若
脫穎與二岐西岫建標絕頂各見雄振迴眺西南隔江下皆
尖崖並削上懸雙岫此卽書童之南東界羣峰所幻出隨江
東五里出二岐東南踰嶺下是爲佛力司司當江南轉處北
去縣十里問之居人始知二岐西峰最高者爲狀元峰乃仍
踰前嶺北去西一里抵紅旗峒竟峒西北一里抵山下北上
斷磴間三里踰山坳均乃東西峰分岐處西北度亂石重蔓
直抵高峰崖畔有洞東向門高穹上懸巖兩重簷覆出無由
得上洞前東向之峰卽似僧帽者其峰亦有一洞西與北山
對懸壑隔莽竟阻不得達予必欲一登峰頂南北俱壁立絕
磴從洞南緣峭梯險轉從峭壁南直抵崖半則穹然無片隙
不復手足力所及遂下飯佛力肆居人蘓姓者謂此峰懸削
曾無登路數年前峰側有古木一株其僕禱而登緇級備窮
峻阨然止達木所亦未造巔後遂問津者絕轍乃返白沙灣
佛力司之南山益開拓內雖石峰離立外俱排山亘嶺桂林
秀出雲峰南盡於此聞平樂以下四顧皆土山巉厲之石不
挺於陸而藏於水山自此而頑水自此而險也

二十四日由白沙截江渡南峰下循麓東南又轉一峰有巖

高張東向爲田家洞卽在白鶴山下軒朗平路上繁垂乳白
鶴東對書童山排闥而南內成長塢塢中舟行六十里可抵
二龍橋出白鶴循北麓溯江三里入東南門肩炬由正南門
出西北循大道向龍洞巖二里東越小橋有兩洞西向其南
列者爲龍躍巖地稍下門極危朗北洞地稍高草塞門徑先
入南洞東五丈層陟一臺臺右有竅深入出由洞北登龍洞
巖熱炬入洞濶丈五高二丈南崖半壁平亘如行廊八數丈
洞乃南闕頂始高後壁下方圓池各一深五六寸泉澄明如
鏡屢對輒滿池上連疊小龕俱無通道處由左壁窪陷處伏
地入漸入漸小穴僅巨管大蛇行南透五六丈始可屈伸已

遊記 三册上
每西一

而遇旁裂龕得宛轉遂躍龍後腋出洞東望龍洞南列峯闕
闔重啟異之遂渡溪東行棘莽沮洳中共一里抵山下初入
西向第一門高穹如峽東入數丈北轉愈昏黑莫窺乃南轉
得明穴西透西出洞門之上蓋南上西向第二門也由其外
更南上西向第三門洞東入成峽如初洞峽底迫仄峽上層
疊有同閣殿八五丈下峽旣盡上懸重門圓整擬剝琢第峽
壁峭削無可上與靜聞索慮躋躡得上峽二層最上層仍懸
亘莫達出洞前仰望洞頂又連啟兩門此又南上西向第四
門第五門也冀其中下通峽內重門於是又過南上西向第
六門仰望懸崖倍高削彌難慰卽又過南上西向第七門見

石紋層異，突出者可置足，竅入者可鉤指，遂反躬上躡，凌數十級，抵洞門。洞北又夾坳，豎起高五六丈，始入上層，其夾光賦無級，計絕所攀，予獨審視，周夾雖無級，饒而夾壁宛轉，可以手撐足支，不虞懸墜，遂聳身從之。如透井，皆橫縹縱發，不階級，登也。既升，夾脊其北復墮成峽，穿映明透，知與前所望洞必有一通。因騎牆坐，上睇洞頂四達，高傳促靜聞，久之至。教之如前法，登同從脊北下峽中，峽底平，曲折北進，西上高懸一門，則第六門也。不及上，循峽更進，轉西出第五門，門有石龍，下垂三四丈，由龍側北循崖端，得第四門，穿門東入，稍下次層中，廓然四闢，右向東轉，深黑無窮，左向西出，卽前第

遊記 三册上

粵西一

三七

三門上層也。知重門若剗處，當在其內，循崖窮之，復隔一柱，轉柱隙入門內，另環一函，不遠亦不透也。自第三門上，連闕四門，初俱攀躋無路，一入第七門，宛轉俱達，升陟重樓，複閣間有莫公臣者，徧題珠明洞云。仍從第六門峽內，西向攀崖上門，雖高張內外都無餘地，不若四五二門外懸臺榭，內疊樓楹也。乃逾春南下第七門，門外循崖復南，又得南下，西向第八門，洞亦成峽，東上雖高峙，鮮所旁徹，此山西向八洞，惟南北二洞不交引，中央四洞最高，紛紜曲暢，較他處一二洞勾連，輒攬奇譽，真霄壤矣。下山循麓南半里，路東西各一峰，屏峙，遂由南門抵市橋，入龍潭菴，莫姓者隨予至，問遊巖樂

乎子以珠明巖誇之曰牛洞也數洞相連然不若李相公巖更勝卽在西門外不可失予仰視日尙高亟出西門攜火炬從岐北行復西岐已繞此山東北兩面蓋卽前屏峙路旁東峰也繞至西麓洞正西向西峰門右鐫閩人李杜記謚爲來仙洞入洞東行不甚高爽南轉遂昏黑秉炬東南入乳竇初隘漸進愈宏放瓊葩雲葉繽紛上下東北轉成穹峽高不見頂其垂突蹲裂種種開勝益深峽忽下墜淵昧不可以丈計炬火星散投之沉沉杳不得其底其左削崖不能受趾右乳柱紛綸窻戶歷歷隔崖探以炬內若行廊玲瓏似可遠達松明將盡乃由舊道出東入西門出東南門渡口桂林舟人已艤舟待遂下舟宿

遊記

三册上
粵西一

三人

二十五日舟過水綠邨北七里西岸一巖門甚高敞東向臨江前垂石成龍曰蛟頭巖由巖右峽深入漸高黑由巖左登前亘爲臺後結一竇尼棲之竇後深陷成峽以無炬返時舟已先移待輿平出洞循麓溯江半里達螺螭峰下繞峰東麓又二里及舟北過輿平二里泊

二十六日北五里抵畫山山橫列江南岸江自北來至是西折山受巖半剖爲削崖石質錯綺成章舟人泊舟晨餐予乃登其麓與靜聞選石踞勝崖半洞北向望之甚深高下都無着足處返而登舟北上小散大散灘至鑼鼓灘共十里其山

南巖竅有水。中出綠髮石。飛下墜江。勢同懸瀑。粵中皆石峰拔起。水隨四注。無待破壑騰空。此瀑出崇竅。尤奇絕。又北八里。過攔州。西北岸一峰純透。初望之。疑卽龍門穿穴。以道里計之。始知另穿一峰。前以夜棹失之耳。又北三里。爲冠巖。先是江東岸巔崖。丹碧煥映。采豔畫山。冠巖卽在其北。山上窾崖層出。麓穹一洞。西向臨江。水自中出。外與江通。棹舟入洞。門甚高。內更宏朗。悉懸乳柱。惜通流之竇。下伏無從。遠溯久之。棹舟出洞。望隔江羣峰叢合。憶前攔州所見穿山。當正對其西。惜溪迴山轉。并其峰亦莫能辨識。頃之忽北見皎然一穴。另懸江東。峰半卽近在冠巖北。亟登岸趨之。期舟候南田。

遊記

三册上
粵西一

三十九

站一里。抵山腋。踰嶺。度明穴。在東南面。絕崖不可攀。反循崖北。稍下。則洞果南透。其山甚薄。上穹如合掌。中鑿北下。俱巨石磊落。南則削崖懸亘。故登洞道必由北。洞東皆旁門。複室東北。彌深。仍轉洞西北。隅又得一洞。南北橫貫。其北峰之麓透而不徹。仍南出。西北行平疇中。其西隔江。屏立者皆穹崖。削壁陸路望之。更覺崢嶸。東則石崖離立。後托崇巒。其四里至南田入舟。

二十七日。經橫山碧崖。諸勝無間。昔遊橫山巖。東向。右腋有竇。旁穿而南。南復闢一洞。甚宏。有門有奧。奧西上則深入昏冥。奧之南墜。皆嵌空透漏。門在墜奧東。廓然凭流。與前門比。

肩立。又西北過龍門塘。南望橫山巖。西透頂峰。雖似穿石。無從上躋。夜過新江口十里泊。

二十八日昧爽。亟推篷已過崖頭山。十里抵水月洞。北城下入浮橋門。

二十九日入靖藩城。訂獨秀期。王僧詞甚遼緩。予初擬再至。省一登獨秀。卽往柳州。至此失望。悵悵。

三十日炎威莫支。倦卧寓所。

六月初一日。訛傳流寇薄衝永藩城。愈戒嚴。予遂無意登獨秀。獨秀山北面臨池。西南二麓。予俱達其下。西巖亦已再探。惟東麓與絕頂未登。其異於他峰者。祇亭閣耳。

遊記

三册上
粵西一

四十

初二日同靜聞再爲七星棲霞遊。由七星觀左入。卽登級爲碧虛閣。閣在摘星亭左。予昔遊急於七星。以爲此軒閣無煩巖齒。後累經其下。上見巖石倒出。異之。至是遂先入。仰視閣上。爲瓦所掩。不見巖頂。旣轉入元武座後。豁然透空。高跨頂上。如梁類穿山。月巖惜人坐。閣內不見出閣後石垣外。始見亂峰飛石。森列掩映。訊閣僧。後山道何向。曰須南自大巖菴。乃出。仍登摘星亭。入七星前洞。由閣後東上。數十級得小坪。石盤其中。遂北轉。透重門出。門東壁外。崖裂竅。懸雲。予亟解衣上。連躋重龕二層。俱列戶。疏櫺勢同垂幄。北下。卽棲霞洞。

盤空西向矣。此山巖洞駢峙。栖霞在北。下透山之東。酋七星。

在中曲透西北出碧虛閣在南亦東西上透三穴並懸六門各異北又有朝雲高峙兩巖皆西向此七星山西面之洞也洞凡五下栖霞南入大巖蒼望碧虛巖後山石叢薄可由菴外東北登遂從菴右草坪中上共一里得坪一區小石峰環拱之秀薄層雲西卽碧虛巖透明穴北卽七星山頂與餘峰攢成斗列者窺小徑出東南均中下山共一里得一巖東南向西下卽曾公巖也曾公西又有洞在峰半攀莽上洞口亦東南向初由石峽入得平展處稍北轉外復有龕東列後則穿門西入內益崇空深轉脊不可睹遂下山出花橋東街此處巖洞駢峙者亦三曾公北下同列者又有二巖予昔遊省

遊記 三册上
粵西一

四十一

春先經此俱東南向此七星山東南之洞也洞凡五若北麓省春三巖曾仙一洞旁又淺洞一俱於前日屐經者則七星北面之洞也洞凡五一山凡得十五洞云返寓於肆得桂林故勝西事泚百粵風土記諸書按部考勝者竟兩日

初五日讀清秀巖記卽出西清門窺之門在西北隅城外削崖之半有洞西向出渡城濠壘西有二岐一循山北行卽北門西來大道皆石峰竅峙其北片片若削下開大洞西南向曰橫洞一從山南入峽疑卽清秀道遂南西行一里峽南北山俱中斷開徑四交徑西北有洞南向窺道北入愈入愈深旁絕他竇夾危底平灣環以進莫測幽際出問行者曰黑洞

也問清秀何在曰正西有山屏立峽中者下有牛角洞由北
徑出峽有塘曰清塘西南瀕塘爲下庄洞無所謂清秀者予
意清塘當去清秀不遠遂北轉從大道出峽峽門東西崖俱
有小洞無徑道可登北出臨塘潄水一泓浸山西北麓循之
西路南嵌崖末北俯淵碧忽一岐南上攀躋漸高設磴仰望
都無懸窾知非洞所在乃下出塘之西其南山廻塢轉別成
一壑門珠杳然仍返過黑澗西向屏立峽中山一里抵屏東
北卽有洞斜窺門東北向南下漸窅昧爲牛角洞出洞達屏
北而西轉出南麓屏南崖峭削色黃赭下有窪潄水從山麓
石崖出崖不甚高中若螻蛄卽牛角洞南通穴至此墜成水

遊記 三册上
粵西一

四十二

窪也又東抵南峽門北入問清秀於道上人其人曰惟北峽
有清塘上有洞南與黑洞通此外無他洞乃悟清秀所托必
不出北峽時已當午遂捨之南炊隱山西過西湖橋一里抵
小石峯下峯片峭裂中界衆峯間南瀕陽江東北西三面俱
短垣環之從西北隙踰垣披其東北抵小峯南麓峯雖小如
蓮之間瓣列房半崖坪中有石高丈許如犀一角獨聳後又
盤空上片攢支削尤增奇幻搜剔久之出問其名曰秋兒庄
西卽陽江西來有疊堰可渡南卽趙家山穆陵邨中隱諸洞
云循陽江北岸西一里爲獅子巖西又聳一峯與獅巖夾有
巖東向凭峭石之上中垂一柱崩櫺裂正東瞰獅巖首北轉

又一洞北向高穹曰天慶巖由級南下中亘壁界洞爲兩入數丈兩峽復合其北峽之上重門複竅懸綴甚高望不可攀登此可直通山南北出洞西北行石山叢薄間山俱森立圓聳松陰石影又北里許經石山西麓兩洞北肩西向捫棘入南洞進五六丈轉從北洞出仰望洞上飛崖片片欲舞爲蝦筓山西有林木廻叢平曠陽江西環之王太守園也仍從雙洞南東北向登得石磴一里踰坳西攀石罅上所攀石鉅若劍戟石斷崖絕中俱棘刺遂出舞空石上瞰北麓斗懸難下尋舊磴下西麓繞出其北東一里至朱家庄出牛角洞南北過北峽門北眺西峽半有洞呀然當卽清秀暮色已迫遂趨

遊記

三册上
粵西一

四十三

入西清門

初十日始出振武門取柳州道西五里過茶菴菴南小徑二里至琴潭巖巖東有邨土人俱訛爲陳搏余得桂勝方信儒記云得清秀玉乳琴潭荔枝四巖故前日首索清秀幾及復失以下三洞無知者予疑陳搏卽琴潭及今抵其邨覓一人爲導聞東南有七寶巖先趨之乃東南渡南溪上流共三里至李家邨邨南石峰西向巉突巖不深而峭蓋在南溪白龍洞正西向遊白龍洞時西望羣山廻曲處也返陳搏邨導者負松明并梯至西趨小山南先觀水洞門南向水匯其內浸

洞口洞中行四旁皆水所際其左深入洞前左崖瀨水趾刻

琴潭二大字卽信儒筆洞左復開一門後與洞通中多列柱垂葩嵌空虛度予旣得琴潭知荔枝當不遠導者篝火執炬請遊幽洞徵幽洞何名果荔枝巖也遂出琴潭沿山左瀦塘行遶塘北轉而西至荔枝巖門東向不甚高西進數丈循洞底右竅入其下穴有方池四旁甚峻再東南轉平入數十丈兩度低隘右崖半一竅高濶僅盈尺內洞平穹潴水齊竅引首竅中東望其水廣邃中石龍蜿蜒南崖石盆一方平度水面不能以身入也仍出至洞底少西進循右一竅入上峽東有石幢圓立繞出其後忽度爲兩層下穴少西轉輒止上穴以梯上躋內復列柱分樞穿樞少西遂下南峽中平入數十丈又南旋成龕龕外洞頂亦復龍形天矯仍出洞底又循北竅入上峽則層壁紛垂懸蓮徹柱雜然綴壁大抵此洞以幽闕見奇而深入在右水竅側小石彈丸大多叢銳痕稱荔枝以此出洞西北三里抵大道平塘街其西石峰峭甚夾立如門南峰山頂開穴達山腹予向尋銅錢巖過此神動今亟問道知道旁油坊後轉東南至古廟可登乃曳杖過油坊南無徑可入逡巡得蛇道伏草間隨山麓東行南轉將抵古廟見有路西上從之始捫級旣乃梯崖崖窮陽峽棘蔓擁沒髻頂鈎不能出久之抵叢石崖下其上分形設詭許透明之穴已與比肩乃橫陟而北愈轉愈出峰頭俯瞰嵌崖削窟反在其

遊記

三册上
粵西一

四四

下有高呼路，悞指予下踐之級者，隨其指下呼者，乃二牧翁云：登崖道尚在古廟南，遂從廟南歷級上，西南轉出山，均間眺其南，一峰枝起，頂豎一石，高數丈，予所見石峰，綴立，雁宕翔鸞、龜峰靈芝及此地，笋石駢發，未有靈怪至此者。度已出崖後，遙瞻石壁下，猶未見洞門，日暮遂返，宿平塘，期明日導遊。

十一日，從古廟南登山，導者揚鑣，斬棘共一里，抵昨返步處，石隙中登數步，望見洞門，西南向，又攀石崖數步，卽入洞，其門前向東北，後向西南，徹望通明，後洞正對，豎石峰，導者謂洞曰榜巖，山曰楓木云。下山過古廟南，由田塍中渡西來小

遊記 三册上

粵西一

四十五

澗水自兩路口西塘迤邐東穿山麓，卽南溪發源也。東南入石巖洞，門西北向，後門東北向，中空洞，旁裂後門，右崖有臺架虛，上又盤蓋隆起，悉窳樞隱透，出後洞，北一里，仍抵平塘街，街北石峰，噴吮若屏，東隅有崖，東向，曰社巖，街西北循銅錢巖，卽前所遊鼓架巖也。西二里，經兩山峽，峽北山巍然，負展，下爲廣福王廟，峽南山東有巖門，東向，西出峽，是爲兩路口，市肆盛列，西北爲義寧道，予往柳州，則從西南永福道路，東有巖，西向，門甚紛紜，多所像類，西四里，路右小峰，如佛掌，高擎下合，上岐於衆峰中，尤詭異，其南又駢峙，兩山東成峽，峽南之山，東層裂兩巖，上巖明透，山後亟南趨之，祇下巖可

入上巖懸壑莫登乃入下巖巖中列柱牽樞爲峽爲窟轉透其後亦橫貫山腹予意由後窟西出可攀躋上巖透處乃上下俱削旁絕階援仍東出洞前東北隅石頗坎珂披隙登上層則前後二門俱與下巖並列門內乳幄蓮柱左右環轉以達後門數丈之內紆折無竟前門一臺正對東北佛掌峰凭後門龕牖遙瞰西南塢外之奇收攬都盡予所見重樓之勝此爲第一既下西向行又見重樓北麓復有巖北向此峽南之山也在峽北者西向亦有二洞層列洞門俱石色赭黃獨爲標異但一出峽漚水直浸兩峽西中疊石堤亘水面旁皆巨浸無從渡水一登赭巖旣又聞有八字巖亦不能至遂由

遊記

三册上
粵西一

四十六

石道西向行漚水中望西峰之東崖壁高亘上懸三洞相去各二十餘丈俱東向駢列其山在漚水西南與東峽南峰東西夾塘成漚遙睇崖端俱有微痕自南之北可上躋惟北洞嶄然懸絕不可階升遂循堤西草徑傍水而南已抵南洞下梯崖入洞門甚崇內崆峒宏峻規模迥別稍下一歧由右入西南轉漸昏窅莫窺底止一歧由左入不五丈一門西透山後一門北通中洞先西披後巖洞門高與東埽上下俱懸崖斗巘遙望西南對山亦有洞若覆梁門廣中邃曰牛洞東向黯黑而不知其涯仍入內北上中洞洞亦北轉而東透探其北轉至洞門有石內度架爲兩層上疊閣倒向洞內下裂門

嵌壁間，卽所望北洞也。仍入中洞內，東臨洞門，門愈高穹。下則崖危路絕，遂循南洞出，由舊級下一里，北出大道，西循南山北麓行，三里，越一平坡，其南北巖洞甚多，不暇詳步。南至通城墟，又南一里，爲上巖後洞，門北向，前臨深塘，入其內，廓然崇宏，峽分左右，進右峽，下墜爲淵，石壁東西夾峻，不可下。其底南眺，沉沉壁西之崖，迴覆淵上，予所駐足，下瞰者，壁東則絕壁之下，駢通二穴，若環橋連亘，水通其中，不知所往。北則石壁自洞頂下，插淵底，壁半裂，柱成隙，泉淙淙隙端，下注出右峽，由左峽上入，則蹲石當門，中聳爲臺，臺上一柱支洞頂，路從柱南北入，內復有石崖自洞北南竅，若塞門，與洞南

遊記

三册上
粵西一

四七

壁夾成罅，路循崖南，西出，繞崖後，外穹爲門，門下橫闕，而上多垂簷，踞闕坐，門外峽復峭峙，兩旁多倒懸下攬之石，若龍爪猿臂，紛拏其門，俯仰兩絕，出洞，循其東麓，復開東向門，內窪下，滴水空聲，轉南漸黑，當卽通後洞，環橋水穴者，河南則上巖邨，邨後疊石開徑，曲折上，爲上巖前洞，門東向，高齊後洞肩，深折不及，洞側有臺趾，由臺直躋，洞後，迸竇成龕，垂石如距，有垂至地下，離一線者，有中懸四旁，忽卷者，有柱立輪囷其中者，有爪攫分出，其岐者，其東南對山，有泉源，曰龍泉。云：下洞仍出後洞塘北，西向入，東來大道，度高橋，共十里，至山蚤鋪，其四旁雖土阜間，出石峰，尤兀竅焉。又三十里，抵蘇

橋爲洛青江上流水始捨桂入柳去予遂與桂山別

裔孫 熙海南校字

遊記第三册上 終

遊記 三册上
粵西一

四八

遊記第三册下

江陰徐宏祖霞客著

子別姓

李 寄介立

輯

季夢良會明編

後學湯

裕帖瞻

重校

同邑

楊名時凝齋閱

族孫徐

鎮筠峒

粵西遊日記二

丁丑六月十二日自蘇橋登雒容舟順流西南五十里過永福

縣又八十五里泊新安鋪

十三日一百二十里抵雒容縣陸去柳州府五十里水須三日溯柳江乃至遂定騎為明日陸行計

十四日出城南西二十里為高嶺鋪南寨山秀立其南乃南

遊記 三册下 粵西二

一

折登嶺共五里直抵南寨山西柳江逼其西崖舟人艤舟以渡有小溪自南寨破壑西注柳江曰山門冲江東西為雒容馬平界去治各二十五里登西岸瀕江南向行為馬鹿堡東望隔江南寨山分枝聳秀亭亭露奇又五里西向踰坳入則石峰森立夾道南峰曰羅山頂北向有洞斜窺開兩門仰眺無躋攀路西麓又有洞駢峙其北峰南面峭削尤甚西二里小峰中夾立曰獨秀峰迴眺羅山西麓洞心異之遂從岐東南披宿草一里抵羅山西南角東轉循其南麓北望山半亦有洞南向高少遜北巔而面背正相值轉山之東踰坳北入一坪中開其右峰北巨石數十丈斜疊起衣折古勁逼肖左

崖之北雙門墜峽下內洞北向深削成淵底伏流澄徹西旁俱削壁數十丈南進窅然莫窺其源北抵洞口壁亦嶄絕上有橫石高二尺如闕可坐瞰其底無能踰險下也北出峽門上有道直上西峰得石坊坊後有洞東向中甚高平寬朗探其左北轉漸黑隘右則西上愈昏遂翼後有透明處久之不得出仍從石坊共二里轉是山西麓先入一洞門西向左轉而西進黑不可捫乃右轉東下窮於水出洞又北卽向大道所望洞洞門亦西向連疊兩重洞外一大石橫卧當門峻不可踰北有隘側身以入爲下洞中懸一石復界洞爲兩南北列先從南門入稍窪下南壁峻裂非攀躋可及北崖有微隙

遊記 三册下
粵西二

二

正穿入北門內內亦下墜東入洞底水聲汨汨與南洞右轉之底下穴潛通由北門出仰視上層石如荷葉下覆虛懸徑絕上躋復從南門側左穿外竅得旁龕龕外有峽對峙相距尺半其上南卽龕頂盡處北卽覆葉端從峽中手攀足撐遂挺虛凌其上上層洞東入不深惟洞北裂崖成竇環柱通門石質乳態各各剝變攀隙西透崖轉南向開二楹下跨重樓陽朔珠明外此爲最出洞返獨秀峰下西向大道馳五六里北望兩尖峰亭亭夾立南則羣峰森繞中有石綴出峰頭纖幻殊甚又西五六里柳江自南而北卽郡城東繞之江也西渡江二里入柳郡郡三面距江故曰壺城江自北來復北折

而去南環甚寬北夾東形正與壺等寓郡治西因靜聞病臥
予亦數日不出

十八日始由大南門渡江之南稍西爲馬鞍山最高而兩
端並聳爲郡案山稍東爲屏風山形伏處方正東北爲登臺
山則又高乃扼江北轉者也馬鞍西尖峰聳削曰立魚山山
特起南復有山映之非近出其下不能辨立魚當賓州大道
在城西南隅由山東北麓躡級盤崖上巖門東向踞山半門
外右上復旁裂一龕若綴閣其左下拾級數層又另穴一竅
雙峽夾壁高穹直上皆門以外景也入巖張巨吻中寬夷整
朗後通兩竅一南一北皆穿腹西入先由南竅進內忽穹然

遊記

三册下
粵西二

三

高盤西復透一門踰闕出西臨絕壑遙睇西南羣峰開繞延
攬甚擴由門右穿峽竅以下復有洞西向石柱中懸柱後穴
卽前洞所通北竅也門內左循巖壁上河橫南北勢愈高盤
頂有五穴乘空紛若列星其下東開一穴前達僧棧置鍵不
通行稍南西轉下峽復西透一門前亦下臨西壑門左轉入
內亦下墜成峽直迸東底深峻不可下緣其上捫崖透腋又
南出一門前一小峰枝起與大峰駢立成坳從其間攀崖梯
石直躡立魚巔是洞透漏山腹東開門二西開門三南開者
一頂懸側裂復十餘穴真異境矣遂仍出前洞門右歷級南
上少憩僧廬東瞰山下塘滙水一方內沁不知所去東北所

對者卽馬鞍山西北麓爲仙奕巖居人祇知馬鞍不復曉仙奕實無二巖也東南所對乃馬鞍西北枝峰峰有壽星巖巖後重巖廻復爲馬鞍輿境非一覽可盡子欲候靜聞并仙奕俱留爲後遊

十九日偕顧僕伴靜聞寓中子獨挈囊爲融縣遊出西南門得沙弓小舟同舟者明晨行竟宿沙際

二十日上午始發舟由城西北溯柳江江之西鷓山亭亭獨立曠野中自柳郡西北兩岸山土石間出土山迤邐間忽石峰數十挺立成隊所異陽朔桂林者彼四顧石峰不受寸土此則如錐處囊中尤覺有脫穎異北二十里泊古陵堡

遊記

三册下
粵西二

四

二十一日過杉嶺江右尖峰疊出共五十里抵柳城縣城西江道分爲二自西來者慶遠江也其源一出天河縣爲龍江一出貴州都勻司爲烏泥江經忻城北入龍江合流至此自北來者懷遠江也其源一出貴州平越府一出黎平府流經懷遠融縣至此二江合爲柳江所謂黔江也下經柳郡歷象州與鬱江合於潯今分潯州南寧太平三府爲左江道以鬱江爲左也分柳州慶遠思恩爲右江道以黔江爲右也然鬱江上流復自爲左右二江則以雲南交水南盤江爲右交趾廣源州麗江爲左也二江合於南寧西合江鎮古左右二江指此今則以黔鬱分耳南盤自交水下田州至南寧合江鎮

合麗江是爲右江。北盤自普安經沂城爲都泥江，又黔江經象州至潯郡合鬱，亦爲右江。是南北二盤在廣右俱爲右江，但合非一地耳。雲南志以爲二盤分流千里，至合江鎮合則誤以爲南寧左右二江，俱源自盤江，不知南盤無關於麗江。北盤且不出合江鎮也。下午自柳城北溯懷遠江入，又十里抵舊縣。

二十二日暑雨時作，僅行三十里。二十三日西北十里，過草墟，江右崖壁甚峭秀，又十里，江左山崖廻亘，遙峰森列，橫合天半。於是舟反東北轉，十五里抵沙弓，融縣南界也。江之西南卽爲羅城縣東界，西望隔江羣峰匯聚處，皆羅城道中所由也。

遊記

三册下
粵西二

五

二十四日仍附原舟，向和睦墟。先是沙弓人謂明日乃和睦墟，期墟散有融縣歸舟，原舟亦往墟買米，故仍附之行。舟自沙弓西卽東轉，北一里有江來自西北，舞陽江也。內灘石甚險，又東北九里，抵和睦墟已散，不得舟，得一荷塩歸者，乃附囊輿之行，北二十里，大道直北向縣，而荷行李者家東梁西，北遂同西北行，二里上雞籠嶺，西大山曰古東山，山東北隅爲東梁，抵縣大道所經也。越雞籠三里，抵其家，去真仙巖尙十里，去縣十五里。

二十五日北取真仙道，過讀學巖，巖有二門，俱南向東西並。

列相去數丈外障駢崖中通橫穴若複道行空層樓內朗垂蓮倒柱鈎連旁映甚軒爽可憩西有小石峰特起田間宛絕延附亦有門東向并越水畦入之初入覺峽逼無奇穿門西進罅迸十字西旣通明南北俱裂窟土人架木竅間若欲爲懸閣以居者又西循溪厓里許抵赤龍巖巖北向高穹山半洞前北竅兩峰洞當其中高曠宏邃底平而上穹門內石臺兩重界其間洞右列柱分櫺別成欹室中洞直入數丈脊稍隆起成仙田中每貯水更入漸窈黑聞內門束如竇止容平身入入則廓然通別竅恨不攜炬一竟其輿山前有溪自西來分兩派東抵東梁北滙安靈潭爲靈壽溪上流云下山北

遊記

三册下
粵西二

六

越溪北山有洞駢立門南向雖高穹側裂中乃下旋如墜螺門外右躋復飛嵌懸崖趣豐凭蹠乃下此山正與赤龍南北對讀學則東西肩列北趨間道正由此山讀學兩峰中此山東隅復開東向兩巖曰鐘洞巖北巖淺峻若豎鐘剖其半南巖門高層穴屢引上透無級入下洞當門巨柱中懸環轉無餘地遂下直北趨二里越一卷脊北爲百步塘尖峰四列中開平壑一圃循山右轉又一里山分竅三峰北向列西一峰山半洞門西向舍之中峰洞東向東峰洞西向先登東峰洞洞南北逆橫峽斜竇有石自山巔下嵌峽底四面可繞而出次登中峰其洞北竅下裂上懸南牖石飛架其間上牖前安

石臺憩臥甚適。下直北徑百步塘。三里越塘北。小溪自古鼎來橫涉之。又大溪自南趨北。卽赤龍巖前水。東過東梁至此。二水合而北行。一石梁橫渡。於是東西俱駢峰成峽。溪流其中。曰靈壽溪。北一里。滙爲安靈潭。神龍之所窟也。又北里餘。山當面橫列。洞門開張山半。余疑真仙巖至矣。至則路轉出。其西麓。遂東行環遶。其北北復有洞。不識中貫南洞否。時望真仙石山。尙在北。北卽安靈溪水流入。真仙後洞處。予初未悟。遂東循山麓出。北轉一里。與東梁大道會。峰轉溪怒。始見真仙前洞。東北高懸溪流。從中北出。前有大石梁。二道越梁而西南向入洞。洞門圓迥如半月高穹。中剜一山之半。其內

遊記

三册下
粵西二

七

水陸平分。北半高崖千仞。南半迴流中貫。由北畔陸崖入數丈。中壁橫拓分二道。壁之西有竅。南入僧棲倚之。壁之東南溯溪岸深入。巨柱中懸。上下綴旒紛鬱。稍後則老君巍然鬚眉皓潔。皆玉乳所幻結。故又名老君洞。其後則千門萬戶。乳像愈極繽紛。以無炬未及。入下則溪滙爲淵。前趨峽壁。激石轟雷。其隔溪東崖。南與老君對者。溪上平簷爲臺。後倚危壁。爲下層。北與僧棲對者。層閣高懸。外復疎明。爲上層。但非鵲橋不能度。遂出憩僧棲。同僧叅慧。入市隨之北。一里過下廊。又北則大江在東。卽潭江。北自懷遠大融南來者。菜筍江西。自丹江橋遶老人巖。至此東入江。二水合流。下廊旁道當其

中北渡萊邕橋入融南關約二里城居寥落問老人巖道復
從下廓北循萊邕江西南行西抵一峰石勢疊聳迴削千仞
老人巖當北溯溪岸予憚南入山峽曠乃老人巖南支與南
山夾成者南峰北麓石磴盤山而上有僧方汲趨問之其上
爲獨勝巖非老人巖也巖北向高峻峰頭僧廬塞其門入其
下不知爲巖也穿穴入內開一龕稍窪亦隙裂成櫺但無光
透耳獨勝北有鯉魚巖卽古彈子巖間乳柱甚豐不及往仍
東北出下廓溯西北小溪抵老人巖山下下有洞東向捨之
西向拾級上兩崖合束懸磴其間取道甚勝已透入一隘轉
北上至巖之前門其巖一洞兩門前門東南向後門東北向
石崖高跨而東窾洞徹其下前後相去不遠亦穿巖類借前
後俱障以佛廬遂令空明頓失從廬側轉入後巖仰見盤空
之頂後巖僧樵未返門閉不得入遂留爲後遊下山出獨勝
東峰披蔓草行二里暮抵真仙巖宿

二十八日參慧束炬導遊真仙後暗洞始由天柱老君像後
入溪之西崖陸洞也千柱層列衆竇競啟前之崇宏雄曠忽
爲窈窕靈輿窮搜殆盡石下巨蛇橫臥火燭之不見首尾踰
之出入竟伏不動然此與雖幽邃猶溪西一隅時時由隙東
瞰溪流冀得一當終未能下涉旣出迴顧溪竇內透天光對
崖旁通明穴益神動不能已托參慧入市覓筏以爲必入水

遊記

三册下
粵西二

八

洞計叅慧復蕪炬引子由巖前左右下北入深穴穴雖幽深無乳柱勾空然下多龍脊盤錯交伏鱗爪宛然亦一奇也出洞叅慧卽往覓舟子恐不能遽得不若躬往索之且以了老入諸勝乃出洞北大道西望山峽間峰巒聳異內有劉公巖草深無道仍從下廓先趨老人巖入下巖門東向西北竅深入漸暗聞秉炬以入徑甚遠從門左仍躋石峽抵上巖轉透後巖內結閣盡踞洞口閣前臨眺上下懸崖峭絕菜邕江西來溪其北麓自爲分合抵巖下北轉去大江當其前恍然如天表飛仙直北卽爲香山遂下山絕流渡江水淺不及膝溯江北行望其西江所從來處峰巒瑰異內有雞塲洞幾隨之

遊記

三冊下
粵西二

九

西遇荷薪僧指香山在東北乃轉循北山東麓一里西登級抵香山廟廟虛無人東北至縣西門又南過下廓遇樵者令覓舟入真仙二人慨然許之先是予屢覓之居人俱云此地無筏而舟爲陂阻無由入洞須數人負之趨不意此乃漫相許予心不以爲然竊計巖中有遺構可結桴浮水獨巨木不能自移還與叅慧圖之旣抵巖叅慧已歸亦覓舟不能得惟覓人結桴爲便意與子適合

二十九日晨促叅慧覓結桴者未行昨所期樵者呼羣至謂子曰已入洞否子應以待舟樵者謂舟不能至若聯木爲桴子輩水中挾之入正與舟等叅慧卽以覓人錢界之遂羣負

木入溪斬竹爲筏頃間桴已就復以巖中大梯架其上更置木盆子踞坐盆中諸人前者引繯旁者挾篙後者肩聳遇深淵輒浮水引之遙不能引輒浮水挾之始由洞口溯流仰矚洞頂益覺穹峻兩崖石壁劈翠夾瓊漸進漸異前望天光遙遙層門複穴交映左右旣入重門兩旁俱有層竇盤空上嵌前後明光皎然彼此照耀挾桴者欲從中蕪炬登崖以窮窈窵子令先溯流出後洞乃復浮水引桴抵洞門門西南向吸川飲壑溪破石而下桴抵石爲所格不能入溪捨桴踐石出洞又砉然一天也溪石坎坷不受踵望左崖有懸級在伏莽中援莽躡空上不數十步輒得蹊徑四望平疇中園衆峰環

遊記

三冊下
粵西二

十

繞卽子昔來橫道北巖之東北隅也返登桴順流入洞中扃東西俱有穴可登而西崖穴高難攀且前遊暗洞彷彿近之東崖則穴競門紛曾未一歷遂熱炬東入其上垂乳環柱與老君坐後暗洞諸勝工力悉蔽從其內穿隙透折多有窟穴星星上徹雲影知其東透山膚甚薄從其側宛轉北出已在老君對崖之下層因崖爲臺下臨溪流再出卽爲對崖之上層上亦列柱縱橫石崖峻阻與此層無徑相達仍引桴下浮欲從溪中再上溪崖亦懸嵌無由上躋計取道當從洞前南轉抵東北山椒可入洞中非架飛梁不能上也乃絕流引桴還登東崖諸人釋桴歸舊處子急呼其中一點者攜餘炬令

導遊劉公洞北半里西南轉入小岐向山峽二里抵山下一
洞在南山東向一北向北山中突峰又一洞東向方莫知適
從忽聞牧者聲咳聲遙詢之北向高巖者是亟披莽從之其
人見子所攜炬一束笑謂入此洞須得數枚炬乃可竟僅此
將何從伏莽中石磴隱隱隨之躋洞門巨石前橫從石隙入
崖石上大鐫西峰之巖四字爲寶祐三年李柱高書前又有
碑記二方其一不可讀其一爲紹定元年太守劉繼祖重開
此巖桂林司理叅軍饒記并書始知名洞以此入洞先爇炬
從其後右畔入孔柱環轉不數丈出又從其後左畔入數丈
後愈轉愈廓玉笋左右森羅升降曲折杳不可窮紀恐火炬

遊記 三册下
粵西二

十一

易盡竭厥嘗嚮出不知蔗境更何如也西望北山中突洞石
態秀出門若雙列中必相通趨其下崖懸無路導者已先歸
見子徘徊留眺復至引入南麓小洞內甚淺不通上巖上巖
危嵌峰半遙望多姿今迫視了無警目處且路絕莫援不得
不爲却步及東行回首再顧紛綸之態復標異撩人仍強導
者芟翳級石復引以登予接之遂歷其上削壁層懸雖兩崖
並列中不共貫外復淺場徒負巧質耳興索然返東南抵真
仙巖阻雨巖中數日

七月初三日出洞往覓對崖明竅徑東越洞前石梁循山南
轉而西徑伏草中時不能見抵後山過春竟不得西前登崖

徑乃莽然躋山半覓之皆石崖嗟峨無處可入度其處似過而南懸崖復下忽二農過其前詢之果尙在北也依所指西北上莽棘中果有一窠止容一身然下墜甚深俯瞰之深餘三丈卽北崖僧棲對望處已聞揚碑僧笑語聲但崖峻下懸不能投虛墜眺視久之見左壁有豎隙雖直上無容足攀指處隙兩旁相去僅一尺五寸可臂紉足撐下乃左轉向隙轉處石皆下垂無上岐圓滑不受攀踐摩腹過旣至隙中兩臂兩足若膠釘稍動卽且溜脫下然卽欲不動支撐久力竭勢必自溜不若乘其勢蹲股就之道溜將及地輒猛力一撐遂免顛頓此法亦勢窮所生非問學可至也旣下巖寬四丈中

遊記 三冊下
粵西二

十二

平下臨深溪前列層柱若護欄巖內四周環壁皆紛紜威狃非雕鏤所能殫前與西崖掩映後復得洞頂雙明竅從中遙顧溪兩端出入處俱一望皎然收一洞全勝真仙爲天下第一此又真仙第一也巖右一石平突溪上由其側攀崖而北又連闢兩龕內俱明潔石壁迴嵌色態交異如初墜處其前崖亦有一柱傍溪起中纖圓類指上抵洞頂復結爲幢絡蛟龍繞纖指下垂環而天矯者數纒內近龕處復有石圓起三尺拍之聲若鐘其旁倒懸之石皆能傳響此皆溪東上層之崖也南與下層並峙崖相隔無幾中有石壁下插溪根無能外渡稍內有隙南入皆倒垂龍形縱橫交折翼其中通南崖

尙有片石隔若鑿空取道於此從下層臺畔結浮橋渡老君
座後宛轉中通無假道於外免投空險真濟勝盛事也時雖
溜下計上躋無援隔溪呼僧棲中搨碑者乞其授索垂崖庶
可挽之上搨者不識外轉道欲以長梯涉溪溪旣難越梯長
不及崖之半卽越溪亦不能下徬徨久之擬候叅慧歸覓道
授索因午過猶未飯反覆環眺其下豎隙雖無可攀援其側
覆崖反有凹孔但上瞰不得見下可因躋聳身從之如鳥斯
翼不覺透井出仍從莽中下山返飯真仙巖而臥

初四日聞西南十里古鼎山有龍巖高懸鐵旗新闢且可從
真仙後溯靈壽上流幾欲命展爲候搨所羈

遊記

三冊下
粵西二

十三

初六日搨事竣始探鐵旗巖晨餐卽行過來時橫列之北洞
及南洞南過安靈潭西渡溪從岐西向山坳半里踰坳路漸
大透山峽出共一里南越小橋卽來時橫涉小溪上源也橋
南山半洞北向無奇循麓西至古鼎邨問鐵旗巖居人指西
北峰半半里抵峰之東南又西始見洞懸山半閣倚於前稍
上得層級大木橫偃級窅上叢木耳芝結其下子時急入巖
不及細簡抵巖巖南向正與百步塘南山相對內亦無奇外
勝頗饒鐵旗名以峯著非以洞著也因問僧龍巖所在僧初
住山誤以沸水巖爲龍巖指子西南入龍巖實在東南古鼎
邨後山子不知從僧半里至沸水巖下穴東北向滿貯水內

聲磁峒東穴亦如之蓋其下皆中空故也予所聞龍巖在山半乃望高上躋上岐兩峰中削千仞東西各有淺穴側鑿終無危巖貯水乃下東至古鼎邨邨後山南向開洞二高峻上穹一圓竅並峙卽從岐東上皆無峽中之水如所云龍巖者既下仍由邨北舊路過小橋溪挾雨瀑漲橋沒水底二尺杖傘以渡念小溪如此若靈壽石堰漲高勢湧必難東渡適土人取笋歸古鼎問之曰小溪誠難涉可不必涉踰嶺抵溪卽隨溪北下止涉一小溪竟繞出老君洞左矣予聞之喜甚踰坳抵安靈西堰果水勢洶湧非搦屨所能及卽隨溪左北行約里半近隔溪橫列之南洞溪遂西轉又環西面一獨峰從其西麓轉北東向趨老君後洞靈壽小溪已東去惟西山夾中有小溪西來注之上有堰可涉循溪而東從左越坳下坳皆懸石層嵌藤刺冒之陷身沉頂手足失勢傾蕩洪濤中洄洑終無出理久之竟出坳脊俯攀棘滾崖出洞在蔬畦得達洞叅慧已下榭支扉矣呼啟者再得入洞若更生焉

初七日別叅慧入城訊舟

初九日始得一小舟過午主舟者至發舟東南行已轉西南共六十里泊沙弓

初十日四十里爲羅巖邨巖在江右層沓班駁五色燦列南崖稍低石芝偃峯頂崖半匏剝一洞常有勝可尋惜來時以

遊記

三冊下
粵西二

十四

暑雨掩蓬，去僅隔江遙睇耳。又四十里，柳城縣南二里，江之東爲蠻攔山，削崖截江爲縣城南障。西卽峭壁叢立，土人指爲筆架穿山者。棹月順流，瞬息二十里。一山兀聳江東岸，排列而南，江亦隨之南折，灘聲轟轟如殷雷，爲倒催灘。又南四十里，抵柳州府，泊南門，城鼓猶初下也。

十一日早入寓，靜聞未寤，顧僕亦病，往返二十日，冀其霍然，同行加以顧僕尪弱，尤甚爲之悵悵。

十三日出城南渡江，循馬鞍山北麓西行，折而南，循其西麓，由西南塢中登山，草沒石級，溼滑不能投足。仙奕巖在山半，削崖下門西向，正與立魚對，祇隔山下平壑中一潭，巖內逼

遊記

三冊下
粵西二

十五

如合掌，深止丈餘。巖右有石端聳，上迸裂成紋，參差不齊，雖可登憩，以爲黑肌赤脉，分十八道可奕，似未確。崖左東南上，又裂一巖形，與仙奕等，西南向其下，東南抵坳中，又迸一巖，亦淺隘不足觀。仙奕三巖齊列，山半俱相伯仲而已。西下山麓，還望復得一巖，亦西向，正在中巖下。巖前砥石如枰，其北石窟成峽，北透通明，中間朗可憩，出巖西盤一山，噴轉出東南山半，有洞西南向，登之，洞門呀然，中高穹上出，下深墜，縱橫成峽，樓殿層疊，雖不甚寬，放固以危峻逼裂見奇。入門有石窠，門右青踞若牛背，復高突一石，圓若老人首，先是立魚僧指其處有壽星巖，必卽此。由窠石左懸級下墜，西出窠石。

下則下墮淵削上級虛懸皆峭裂不通行東入峽道中灣環以進忽天光上映仰睇若重樓空架兩崖上覆下嵌無由渡虛上躋遙見光映處內門規列高懸夾崖末外戶分透前山頂平若覆帷恨不牽縷一登下山東仰北山半復有門南向計其處當卽前洞光映所通也下俱迴崖層亘稍東循崖西北上踰下崖抵中崖上崖卒懸絕不得上復從前道下更東循崖角西北登上崖沿崖西陟則洞前三面皆危壁倚空惟此一線盤崖可達前有平石如露臺內旋室方丈四壁俱環柱駢枝分布密嵌西北內通一門下臨深峽果卽前所仰望透空處也仍循崖端東南下南復有山鵲起從西麓仰聯山

遊記

三册下
粵西二

十六

半懸崖穹拓黃斑赭影欲登無路循山南行得微徑從草中東上抵一門外錐穹然內僅如合掌無可深入望黃赭削立處已在其北崖嘴間隔不可盤陟復下至山麓再從莽中望崖登久之抵崖下崖危削數千尺上覆下嵌若垂空之雲亘接天半每當平削處裂孔一方中多紛紛奇詭第瓊隘不能深入循崖脚北行上有飛突之崖升降石罅中如度麥虛檻榭披覽久之下山東出前峽踰界峽石垣又東兩崖石皆巉嵌叢翠倚之共一里出馬鞍東麓得北來道截大道東一里爲郡東門對江渡於是瀨江南岸倚屏風山北麓東行里許抵登臺山江爲山扼轉北去路從山南繞東麓而北一里有

山橫列三峯其陰卽王氏山房所倚余昔來自雒容從其北麓渡江者也山南有洞駢立南向呀然其山倒石虛懸內裂三峽通外三門宛轉迴合惜不甚深擴西峰之陽復有一巖南向皆赭赤之石中甚淺遂下酉披小徑北循西麓踰一岡竹塢蓊叢共一里於是東倚山麓西臨江坡坡上密箐蔽空連麓交映道出其下行空翠中一里抵姚埠東門渡由邨後南向登山入竹塢中篔簹萬箇俱碧玉森翔塵喧開滌頓盡已而上山石磴甚峻西南折穿榕樹根中又東上過一度石片下石去地五六尺崖旁平皮出薄齊架板上爲王氏山房小樓三楹橫洞前北臨絕壑勝瞻遐眺樓後卽洞洞高不受樓掩曰東林洞洞後分東西竅南入西竅稍東轉黑隘不堪進東竅亦從南入轉東忽明踰東闕出巨石迸裂成兩罅北透者石叢而平臺中懸其東下隙則茅閣虛嵌削崖四旁聳石成雲非若他山透腹出一覽竭致也從洞東南躋嶺頂石磴危峻收望愈擴直南盡登臺久之下山渡舟適至由東門二里返寓

十七日同靜聞輩下潯州船以中元節無旅客故留滯數日

十八日晨餐後放舟十里有小山在江左江稍東北曲小山東爲龍船山又西南爲夾道雙山乃北門陸路所出也又五

里爲油閘江始東轉十五里乃轉而南南十里爲山門冲卽

遊記

三册下
粵西二

十七

向日雒容來渡江處江東爲南寨山西麓石崖廻返下嵌江流又南十里爲羅峒前有山兀突坪中罅裂其南上連下透如石門巔又一圓石突綴作一僧倚崖南向肩與崖齊頭顱上出又五里諸峰叢叢江右由山門冲至此江稍西南轉又東五里轉而南一崖懸突江左層巒叠嵌光采離奇更有尖峰若牛角遂東轉五里廻渚成涯曰犁冲山脉北自牛角尖直下江流環其東南西三面中成盤涯宛似犁尖云忽北轉五里直抵牛角山下復轉東去灘聲如轟雷久之乃止懸流迴湍一瀉數里曰橫旋灘自犁冲北轉至此若破壁出東南下灘五里山漸開又東北二十五里至三江口洛青江自東

遊記

三册下
粵西二

十八

北來注日已西遂泊

十九日乘月放舟五鼓抵賓江有巖特立江左下削上窅江因之西轉二十里至象州城在江東岸隔江卽爲象山西二十里過大容堡遂西南行兩岸始廓然無山又東南十五里都泥江自西南來會江東北岸一小山北面分聳西岐爲元突東峰峭削尤其正對都泥江入江口特建標以識都泥江者北盤之水發源楊林海子抵普安州由泗城下遷江歷賓州來賓出於此溯流舟至遷江止上流卽土司蠻峒人不敢入水多懸流穿穴故鮮核其源流也又按慶遠忻城有烏泥江由縣北合龍江詢之土人咸謂忻城絕無北合龍江水口

蓋卽都泥南下遷江者且遷江析城南北接壤烏泥都泥音聲相亂實無二水也又東南二十五里東下大灘曰菱角灘又二十里泊瀧邨

二十日放舟五里下大鷺灘江右石峰復駢列出又南五里至武宣縣隔江西岸山卓立岐分引隊南下巖皆奇詭若垂首引頸僂北肩種種怪異志謂縣西有仙人山南有仙巖山當卽所望諸異峰也東南十里兩岸復擴然又二十五里爲勒馬堡過此卽潯郡桂平界南十里兩岸山漸合又五里爲橫石磯石自江右山麓橫突江中返流倒湧遂極湏洞勢兩崖連山逼束至此爲入峽始又東南二十五里爲鎮峽堡

遊記

三册下
粵西二

十九

又十里兩岸山勢益高聳獨冠諸峰間出石峰懸峙江至是轉而東其南廻東轉處江左瞰流之石有大書鐫石傳爲韓督憲留題云東北二十里小溪自北破壁出其內峻崖屈曲如夾堵墻又東卽大藤渡峽處南北兩岸俱有石竄立江心昔有巨藤橫架江上故南北兩山猺賊此追彼竄得藉爲津衝韓公雍破賊斷之因名斷藤峽過斷藤五里下弩灘遂南出峽口一水自東來注曰小江口合而西南下勢甚峻急蓋北自橫石磯入峽南出弩灘其中山勢廻逼正如道州瀧江巖州七里灘但此峽相去六十里始入爲東西峽中轉爲南北絕無居廬叢木蔭蔽兩旁悉猺獞窟宅故得因勢展暴使

刊木開道則亦丹崖釣臺勝概相麗矣出峽西南循山下十五里抵潯州府日已暮泊於北門

二十二日留靜聞顧僕寓潯之南門覓擔夫爲白石勾漏都嶠三山遊從驛前南渡鬱江八里至車路江小水自東南西北入鬱郡舟上水可抵此又南二里爲石橋邨南望白石山與獨秀山各挺峙三十里外實尙六十里而遙爲山道迂複也邨南二里得迴石一壑清流中瀦石皆玲瓏迸裂爲蕪原生采更南滙潭益盛東有山自南抵北從其西漸升而南益迸穴平地陷爲峽爲井中悉叢石合嵌澗水澄其下益地中二丈下皆伏流潛通石骨阻亘偶骨裂土迸則石出陷成

遊記

三册下
粵西二

二十

穴云又南二十七里抵姚邨依山滙水真山中樂墅也渡小溪南踰嶺五里爲木角邨邨在白石山北麓去山尙十里炊宿山邨春舍間

二十三日東南越嶺岐徑望白石趨其山峰巒崖絕東北特聳一峰爲獨秀孤懸峭削上齊白石頂下則若傍若離直剖其根崖石獨多赭赤色五里路漸沒草間嶺半得一山家傍舍植芭蕉甚盛趨問白石道尙在西南由其左登山東向上南轉山脊五里度均稍東卽南折直抵山北麓獨秀已不可見惟危崖盤削下多平妥之石盤亘疊出又作一態直上抵崖石下南出其二里爲三清巖巖西向橫開大穴濶十餘丈

高二丈深及澗之半石特平燥不作紛紜滴瀝勢卽白石下洞也又南半里爲大寺後倚崖壁寺左水自半崖下滴曰圓珠池池無他異按志山北有漱玉泉西事洱百粵風土記俱謂其泉暮間寺中鐘鼓輒沸溢起正則寂然詔爲異及抵白石寺并漱玉名不知何况聞鐘聲沸非寺僧之蠢卽著書附會之談也遂由池前南循崖壁行已東上入石峽峽兩峰中剖上摩層霄裂罅相距不及丈磴懸其中時有巨石當關輒置梯以度連躋六梯始踰峽登均均南北猶重崖摩夾稍北轉循均左行則虬木叢篁迷雲暗鳥身度香漢上不知午日之中東嶂稍開始見獨秀峰東北立東南塢中又起一峰正

遊記

三冊下
粵西二

二十一

與獨秀對峙高殺三之一宛然蓮蓋中擎但四面爲諸峰所掩惟此得觀全體耳又北攀懸崖上木根絡石間爲梯爲繩得受手足緣躡已轉一壑礪自山頂西向墜峽纒搗潭穴峽南復懸梯上登宛轉三梯東行平岡間外則萬仞下削內卽絕頂激根之峽內外皆松木一道深碧間日影下墮臨風颭曳閃映萬端林盡鑿石成磴躋磴轉會仙巖呀然南向矣巖皆黃赤石上下開穿內漸奏合無紛紜滴瀝與三清同而地位高迥已窮極幽暢乃從巖右躡削崖凌絕頂崖雖危削盤阻處中有子石鷺卵大嵌突齒齒上露其半藉爲麗趾級不覺一里已踴出峰頭東向與獨秀對揖此峰正從潯郡來所

望獨秀西白石絕頂獨秀四削如天柱非傳翰不能翔上此
峰三面亦危崖特立惟南面開罅梯隙得躋頗似大華三峰
上分仙掌下懸尺峽透險躑躅此真青柯嫡家他未見其比
卽桂朔柳融諸峰非不亭亭直上然石質青幻片片芙蓉攢
合竅受躑躅痕受攀無難升陟此則一劈萬仞雖曲循隙窅何
啻蹈空自奮也獨秀蓮葢二峰爲此峰門戶其內環壑深坑
虧蔽日月重岡間之人無至者久之下會仙歷三梯三里至
峽坳之上峽南一石倚崖起下有線罅穿其中僅容側身進
其上或連或缺旣而漸下南轉出罅飛石上下懸嵌危不可
躋返出石峽坳倚石側復有道上出石端危懸殊甚攀根引
蔓僅躋其端透入石關中卽倚石西盡處與前崖夾成闕穿
出闕南抵飛石南懸之上瞰前罅正在其下遂攀登倚石頂
則一臺中懸四崖環峙上又連者如橋缺者可瞰如井下峽
坳歷六梯一里西出峽又一里北返寺

二十四日西向下山三里過周塘邨倚山環池樹木掩映南
七里爲麻峒墟又二十五里宿中都峽

二十五日南二十里下核桃嶺犬溪自南來西折去卽潯郡
西繡江上流也發源自平山墟乃大容山西北水大容東西
有兩繡江一南自廣東高州北至北流縣合大容東南水經
容縣注於潯此容縣繡江也一卽此水爲潯上流之繡江循

遊記

三冊下
粵西二

二十一

溪三里涉流渡江水及腹爲橫塘渡潯郡南界止此江南卽
鬱林地屬梧州西北境由江南岸溯流踰嶺南五里過白堤
亦深山輿境溯溪右南行八里得大寨邨自白堤至此山迴
谷轉夾塢城塘溪木連雲堤篁夾翠宛然避秦處也

二十六日西南十五里過善帽山山稍開南見大容又五里
爲平山邨東望大容在三十里外猶有層峰間之南十里轉
峽西出爲勒菜口於是山分兩界大容東北峙寒山雄倚西
南排闥東南去中成大塢溪流南注爲羅望江源十里過馬
羅廟廟南峽愈闊寒山南盡而大容東轉於是平疇擴望南
有岐東涉羅望江循大容南麓過陸馬廟東四十里可出北

遊記

三册下
粵西二

二十三

流縣予取鬱林道南十里正松城墟

二十七日十里抵鬱林州州西南一里南流江自東而西其
流較羅望爲大涯下泊舟鱗次上有堤內環爲塘堤下臥石
片片橫列涯間紫泉在堤下石片中石南北夾成橫罅橫三
尺闊二尺東迴環而西缺其南水從底上溢滿其中停泓者
三尺上從南缺處流瀉去時見珠泡浮出水面泉之西有石
梁曰南橋跨南流江橋北文昌閣當江流環轉中虛敞可眺
爲此中勝覽橋南爲廣州大道予由岐湖江岸東行水月巖
道也東北共二十三里踰山峽東下峽東石峰森森自北而
南出峽循西土山東麓而北一邨倚山東向又北一里半東

轉得龍塘邨。邨踞岡脊中。其南水南流東去。其北水北入水月洞。由其東又北一里半。直東抵石山中峰。度石橋而北。則上巖西向。高穹山半。上巖者。水月洞南倚山。憑虛之竅也。石山自東北來南引。而下一支中出者。西瞰平蕪。削崖懸竇。層結皆不甚深。而此層最下。亦極擴環。峯石皆青潤。獨裂巖處。色變赭赤。石質尤窮極神詭。尋丈之間。穴穿蓋偃。無不具足。巖前架廬當門。敞其上。不使掩巖勝。由巖右腋穿竅上。復出一層如偏閣。其左腋可環柱。出柱側緣崖上。躋轉出巖末。復得巖西向。自分左右兩重。左重在下。垂柱裂。竅仰睇上。卽右重也。然歷磴無階。由外北躋。始入右重閣。綴絕壁。與左層翼對。增妍皆巖之中層也。其上削崖絕頂。尙虛懸一重。級絕攀躋。惟供矯首耳。水月洞在上巖北地。稍下龍塘。水經石橋北。過上巖。乃東向。搗入水月洞。洞門亦西向。路由其南。水行路北。相沿入水。北透後洞出。前後洞門一望通明。水旁蹲石夾流。兀突俱作獅象形。洞頂垂石。夭矯交龍舞螭。繽紛不一。其水平流洞中。無真仙巖之大。兩崖亦失其深峭。可褰裳涉溪。崖右有一小水。南自支洞出。爲陰洞。左則沿溪。笋乳迴夾。上亦裂門。綴穴層閣之上。又匯水一池。爲奇。此明洞以內勝也。後門崖口。列大柱數條。自門頂合并倒懸。洞內望之。蜿蜒浮動。此明洞以外勝也。陰洞乃明洞窟穴中。又分水陸流不甚。

遊記 三册下 粵西二

大東南自牛隴又開一門穿山腹至此合明洞湖流南八半里洞漸沉黑崖益斗水益深結筏積炬曲屈約二里出牛隴此陰洞水中勝也從陰洞溯流始崖左嵌石下竇甚隘匍匐下穿引炬而前忽巋然上穹上下垂聳盤柱詭狀百出升降其中洞心駭目遂曲莫盡此陰洞陸中勝也是日子抵上巖已過午道流方扃戶出予坐崖下荔陰間久之道流罷釣歸卽促其束炬爲水月遊旣入明洞篝火入陰洞道人不隨支流入且其側伏窪穿隙逼收陰洞陸崖勝中崇宏幽奧森羅衆詭凡五易炬由欲溯流窮水崖道人以無筏辭請別由牛隴探其後崖不必從中出也乃出明洞涉水窮左崖之勝仰

睇後洞諸垂虬舞龍石出飯上巖宿

遊記 三冊下
勢西二

三十五

二十八日子曳杖窮最上巖下憩右窾偏閣中旣午循山而南至昨來所渡石橋橋側東折入峽中是山石峰三支俱鋒稜巉削由東北走西南中支爲水月巖所托是峽則中支南支相夾者南支多削崖裂竅予來時循其西麓詢之土人皆曰中不甚深今故從峽中轉其北得平窪一圍羣牛散寄其中知爲牛隴窮隴西北水滙成潭陰洞後門卽東南臨潭上四旁皆陡石無路入必涉潭乃登洞甚虛敞隨水西入漸北轉石崖成峽水亦漸深昧與水月陰洞所見等雖未出其中兩端源流悉見可無煩暗中摸索也洞門右崖馬蹄痕莫紀

其數疑卽志所載天馬洞出洞益遵峽而北東西兩界峰石
翔聳蔚然霞綺二支北盡處北支又兀安起與中支北麓對
峙成峽下有三洞南向蒸雲流電閃爍多異東畔二門駢
列雖懸乳續紛俱不邃進其西畔一門孤懸峰半洞門嵌空
中忽淵墜深且數十丈宛轉內透極杳渺之勢但兩崖直削
無級下降踞崖末望之飛鼠千百成羣見入蓬蓬內窺聲傳
遙谷出洞望中支西北山嘴頗近以爲由此穿水月後洞抵
上巖甚便趨一里至其下攀陟山岡則巨石飛聳中都蔓絡
脚嵌沉淵底遙探洞外諸奇石杳不可見卽溪流破壑出者
亦盡沒其跡乃仍出向峽返上巖復至水月後洞眺望所陟
路斷處尙隔一峰嘴也

遊記

三册下
粵西二

二十六

二十九日由上巖過牛隴共三里出峽有兩岐直北循北支
石壁東麓者爲北流大道東向踰嶺者爲間道乃從東岐二
里抵塘岸墟墟爲陸川北境北轉卽北流屬二十里爲橫林
邨北石山一支自北而南叢簇尖翠予初望之以爲勾漏在
是漸近路出其東南西望而行秀色飛映蓋此山在北流西
十里勾漏尙在北流東十里也自橫林共東北十里抵北流
縣縣當大容南面之中山脈由大容南下曰綠藍山水分東
西流東流者爲北溪循城東下登龍橋入繡江西流者卽南
流江源西南合水月洞水經鬱林南門西合羅望定川諸水

南下廉州入海是縣實爲南流源其曰北流者以繡江東自
粵東高州來至此始勝巨舟東過容縣界合洛桑渡水經容
邑南門下藤縣北入鬱江去非謂北流源此也縣西十里爲
鬼門關東十里爲勾漏山二石山分支聳秀東西對列而鬼
門巔崖邃谷兩峰合立路經其中勝與勾漏實相伯仲予自
橫林北望卽奇之不知爲鬼門也至縣始悟已從東南越之
過以不及經其下爲恨出縣東門飯於沙街北出隘門抵北
山下循南麓東行五里度溪橋入石山夾中南爲望夫石卽
黃婆巖西垂山也北則石峰透迤愈東石骨益瘦疑卽獨秀
巖所托今已失其迹峰東崖大書勾漏洞三字此南北二石

遊記

三册下
粵西二

二十七

峰俱東拱竇圭洞予東行夾中凡五里石山迴合中復窅一
峰勾漏菴正倚峰南麓其西隅卽竇圭洞菴頗整潔內堂三
楹西則葛令也葛像綸巾朱履飄然欲生前庭佛桑盛放乃
令道人多覓竹束炬爲明晨遊具道人欣然願前驅

八月初一日先作竇圭行約道人肩炬篝火後至洞在菴北
半里菴後先有兩巖一南向一西向望之俱淺竇圭更在其
北漫流自西北來東向直漱山足北涉之登山抵洞門門西
向左開巖軒敞平臨西峰右則深入窪嵌下一石柱當門端
石斜飛磴道由其側下至洞底交關爲四歧由東入由南入
者二歧俱深黑歧而虛明則一西向豁一北透焉西向豁者

卽止門所由入內與東岐黑穴對北透乃偏門另啟正對南
岐黑穴也岐交於中成十字東岐之南頂側忽倒垂一葉平
度半空外與當門柱適對上下憑虛各數十丈卷舒懸綴薄
齊蟬翅葉間復分開竅竇若眼之決背由東岐南崖攀級上
抵葉根垂蒂處盤旋蒂側出葉間踞孔坐其上坐久之復盤
蒂下向北透岐岐中一乳倒垂長數丈水由其端涓涓下更
北入峽中右則窪而北出爲下門左復稍高北度疊成上閣
閣前平臨西北亦有乳柱界其中此明洞西北二岐也道人
負炬至熱火先入南室兩旁壁峽起高而不廣入半里側皆
裂竅垂柱少進忽下墜成淵由洞抵水深二丈水之深不知

遊記

三册下
粵西二

二十八

其幾也兩崖俱無可着足南眺其內窅黑莫竟促道人涉淵
言水深曾無徒涉者促之覓筏則又云隘逼曾無以筏進者
然則若何可入曰冬月水涸始可墜崖涉入何如曰內甚深
能見明而不能升也予聞之悵甚捫石投水中淵淵不遽及
底旁燭之仰見左壁有旁通隙入則漸束無餘竅乃下返出
四達處更入東穴初兩旁亦成峽壁下漸高中闕如堂皇稍
北而東徑遂窺比之南竅雖有穴宛轉深不及其半乃謀爲
白砂洞遊道人復肩炬束火從北透偏門下層出循山西北
麓行始見其山前後兩峰駢立而中連峰西南窳者卽寶圭
東北峙者乃白砂所伏白砂亦前後開洞前洞北向高敞分

爲三門兩旁峻懸中可俯級入後洞南向高隘僅通一線前對寶圭背東卽二峰中連脊也先經白砂後洞草沒無徑道人不可入北去一里東北轉繞山北麓南躋前洞入門卽窟下數十級及底仰視門左右各有隙高懸卽所謂左右門也逆光流影豐照四徹然虛嵌莫得攀其處從洞中東轉頗崇宏漸窮漸黑予遍探四面無深入路出促炬命導仍入其中以火四面燭旁無路也導者忽從南壁下投炬蛇伏入竇高不踰尺廣如之旣入忽廓然盤空衆象羅列方瞻接不暇而崇宏四際復旁無餘隙透東轉南條開條合凡經四竇皆隘若束管薄僅透屏故極隘忘窘屢經不厭其煩也旣而東崖之上大書丹砂二字南有岐入之不深出向西轉再南則天光四射後洞門在望矣導者欲仍從前洞返予強之出後洞見寶圭後峰特爲當門屏乃西南披草棘出坳仍過寶圭北偏門將及菴東探清泉巖卽前所經南向巖也還飯菴中下午探近山諸勝西南入黃婆巖黃婆巖者寶圭西南諸峰所裂巖也其山西自望夫石東來巖當其東北隅與寶圭東西對稍南遜巖門外極危聳黃崖綴其中巖頂峰石分岐發異惜內無深入窾西抵望夫山西麓環觀東西南三面鼎立諸峰巒岫無出黃婆一面者按其攢簇之勢疑卽志所載巫山寨云已乃循黃婆東麓南抵東南隅石罅懸峭片片飛雲綴

遊記

三冊下
粵西二

二十九

空自外崖攀峭石上，歷豎隙，屢出層空，達峰頂，遂盡發其危
嵌態，下山轉循南麓峭崖穹立，石色雄赭，乃東由營房橫過
勾漏菴後峰，東南角蓋寶圭所托之峰，南面駢立而中連，西
立一峰，卽菴後清泉巖所倚，東立者與之比肩，南向循峰東
麓北行路，左得一東向巖，內頗深，漸縮如牛角，出洞又北，清
流一方淙淙，自亂石中出，上皆草石蒙茸，莫辨其自來，忽一
少年至，曰：欲覓洞乎？其上翳草中，二洞相距數十丈，可探入
也。予亟攀棘踐刺覓之，深蔓中，洞門果穹然，東向外爲蔓石
擁蔽，入洞卽墮，然下墜俯瞰之，有溪自南而北貫其底，崖勢
峻立，非攀緣可下，四矚其上，南崖有墜而未盡者，片石懸空，
若棧道架壁，闊不盈咫，而長竟墜處，直達西崖，但中棧有二
柱駢立，若樹柵，斷路外一柱已爲人截去，下存尺許，可跨而
過，但其處益狹，必以兩手握內柱，外柱始得越，臨深蹈險，莫
此爲甚，過棧達西崖，與洞門正隔溪，相向乃明炬燭之崖之
下，深墜與外崖等，上則垂列乳柱，廻錯開闔，踈孺窈窕，深入
猶徹外洞光，乃出崖臨溪，從深墜處投空下，抵溪中，仰視洞
頂高穹，延照內映，側棧凌虛，尤增飄渺，溪水深不及膝，南從
崖脚湧出，北墜崖去，卽由此東出爲亂石泉源也，於是從南
崖溯流入，穴極低，垂覆水面，距止尺，遂衝沫過，纔南入數丈，
望前有流光熠燿，又南數丈，洞復穹然，高盤轉而東西橫貫，

上則東闢爲外門。門高聳。與前所入門等勢。時從人亦至。乃令其以炬更前。西向溯流。洞愈宏放。流益深闊。又數丈。石砥中流。登石內望。洞闊如廣廈。淵潭四際。其下以杖測水。不竟其底。不知更幾轉。得抵寶圭南穴。前所望深墜處也。返步隨流。仍抵東闕。外門下。從人將垂首及膝。腰橫炬。匍匐北向。低穴出。予止之。曰。此門雖峻。與先所入者無異。不若攀空躋危。竟登此門爲便。遂攀崖出洞口。門亦東向。與所入門比肩。特翳於宓石。連蔓遂相顧。不見洞外。循左崖平出。返眺門頂。又上闕。一重。惜無躋級。蓋北洞與室內羅。此洞外綴層樓。所異者此耳。遂一以北洞上登法。而下崖。半石隙。蔓影中。彷彿并一里。入勾漏菴。

初二日錄詩寶圭者竟日。

初三日飯勾漏。卽東北行。由營房轉山之東南角。過亂石。透泉處。徑草坡。五里。越坡。一塘。匯水。環浸山谷。度橋。約二里。堰塘愈大。石峰至此。東盡。山北隙中。露大容。蜿蜒爲列屏。又東十里。水自西北大容來。東南入繡江。爲容鬱分界。曰洛桑渡。水頗急。以藤橫跨西崖上。繫船於藤。渡者引藤就進。謝絕篙楫。又東二十五里。爲景清新橋。則大容東峰巍然北臨。若負一辰。又五里。入容縣。出城南門。門外繡江自西而東。西南合涪。

龍江北出藤渭龍源出天塘山北向石寨邨始入繡江渡江
南十里宿古樓邨

初四日西南循大道盤都嶠而過蓋都嶠北俱削崖懸亘無
級可階必繞出其南始可北向以登共五里過石寨邨又一
里抵石嘴鋪鋪東南八里有黃土巖不及登東度一橋始從
岐北向上山循池東上五里抵南山寺古稱靈景寺大巖倚
東崖門西向外欄高垣設蓮座於中雖云寺實巖也蓋都嶠
北穹高頂南分兩腋如垂臂直下下兜成塢清塘一方當其
中兩腋石崖皆重疊迴亘一巖甫斷復開一巖層穴之巔復
環層穴外列多門如絳帷紫幄紛披競綴靈景爲東腋首巖
最高而大高三丈五尺深五丈橫闊十餘丈兩端稍低中穹
如半月北有三巖皆西向差小三清則當分股兜合處巖高
深橫闊同靈景東有南向二室與西向巖易隅齊列其西有
飛巖則南轉東向爲西腋戶迤邐南下與靈景分門對峙若
兩廡此下層也三清上又列重門爲中層無緣階道其上又
啟一巖爲上層是名寶蓋巖高十五尺深二丈闊五六丈後
倚峰頂地愈高上獨當中幹平臨兩腋巔再上節中盤頂上
午先抵靈景門外竹光秀映巖中霞幄高張心樂其幽曠僧
留午餐聞三清觀道者已他出竟止寺中

初五日由巖右北行歷西向三巖盤登上入南向二巖共里

半然後抵三清巖巖孤境寂樹拂空明又西歷東向虛巖乃仍返西向三巖間取道北上又一里半沿躡崖末抵竇蓋巖下視中巖嵌入足底而下巖三清樹杪若浮空載之者巖左循崖躋石石廻亘如盤髻上突俱不中空雖峭削無容趾級而子石嵌崖一同白石絕頂可緣之上上一里遂凌頂乃知是山東西駢列惟三峰最高皆北聳南俯此其最西者也廻眺最東層疊更多但不及此峻耳北又橫突一峰爲此峰北護卽縣南望之趨者其北面峭削特甚西則旁插一峰頗尖銳爲此峰附西北兩附間下開一門內環爲峽乃北護山與西高峰夾而成者峽中又突嶂中盤爲當門屏由屏東進峽

遊記

三册下
粵西二

二十三

南轉則東西二高峰交夾隙也廻合甚深曲乃從舊道下至靈景巖飯石嘴鋪北過石寨邨東望峽門窈窕聞其內山半有竹簡巖遂東向峽門入一里抵當門屏下其南面裂垂罅削爲三崖西則下屬北護峰與之益起東面危崖獨展與西高峰麓相對成峽峽南堰水爲塘環滙南罅三崖下西附小峰卽椎立於南塘上一家結茅居之環戶以竹致幽甚由此渡峽東上西峰北麓一里越嶺少下下又成峽細流南向直墜椎立小峰腋溯流北入澗壁萋森藤竹映其上菖蒲覆石嵌水根葉交加足之所投知菖蒲不知爲石也緣澗上東南躋嶺其一里飛石二丈當道懸梯入則竹簡巖在其北兩巖

垂列門俱西北向高爽殊快南有飛泉外墜巖下崖直達澗底計巖後卽西高峰絕頂當與三清巖胸背值若由此置磴可先登峰頂次第下諸巖也返至環塘西探南面裂罅罅相距五尺兩罅並起界崖爲三俱危懸絕峭仍東抵危崖獨展處循崖北行夾澗藤樹密冒深綠空濛徑西飛巖千尺轟影流空隔絕天地若不有此行止謂都嶠南北峭秀可一覽罄幾失此幽邃凡二里危崖北窺與塢西轉卽當門屏北麓也較南麓三裂崖稍遜其峻亦環亘成塢焉路乃捨塢東向復登嶺嶺乃西高東北支北走屬北護峰者踰嶺復開南北塢塢東乃中高盤亘上亦有巖懸綴下與西高夾爲此塢北更有重崖間之南則灣環以出不知所極旣而南見兩三家倚西峰北麓居則石背邨也時日已下逼抵縣尙二十里亟返出石寨邨北過古樓邨昏黑中抵繡江南涯叩昨來炊飯家宿

初六日出容縣北門卽西行已復北轉循大容東麓十里水自西北來東入繡三渡溪循溪溯流行夾谷間五里爲石頭鋪復亂流涉水山勢愈夾西折入山峽行透峽共五里山復開爲李邨度一橋更入幽阻盤折山峽間樹蔓壑底溪流藤箐沉翳舉首不見天日五里躋嶺復盤折其上峽又五里山迴谷轉瀦水滿腹浸山脚皆平隘不流左右幌漾真山棲佳

勝處南出峽水遂西流爲水源蓋大容北下脈所盤夾成者西北二里至同山墟山乃大開西轉仍見大容西峰巍然頽出也又五里止雞黍山北塢秦窰邨地多大竹裂竹片大至尺許

初七日西北七里踰長嶺始北望白石山在重峰外又八里爲平地墟西羅江自南東北注源出大容西北至此始勝舟東兩日程出頭家寨下繡江云又十五里抵羅秀北三里將至盧塘道旁空樹一圓出地一尺五寸圍大五尺中貯水一泓水面上不盈圍者五六寸下浮出平地幾及尺澄碧涵瑩杖抵之深不可測珠泡沸沸上發屢斟出之輒齊舊痕不與

遊記 三册下
粵西二

三五

地平尤爲可異又二十里渡大水河抵陳邨初八日西北八里上一嶺正西瞻獨秀下山二里爲陳冲已出獨秀東北正子昔登白石頂東望深塢中聚落也又三十里至陳坊墟宿初九日西十里渡鬱江返潯郡寓中兩病人比柳州時少有色橫州船以明晨早發遂攜囊下舟候

初十日未明發舟曉霞映江從蓬底窺之如行紫絲步障中三十里望白石山亭亭峙東南甚鴉西北三十里泊鎮門十一日二十里爲白沙又五里登涯向羅叢巖東北里許北望數峰叢平疇中南一小峰如立指中三四峰東西駢立再

北一石峰稍低而橫亘卽羅叢所倚也。由小徑四里透小石峰峽。又三里北抵羅叢巖門南向索炬同導者入洞頂高處盤窩成蓋。又倒石捲空上垂但無登處。北入五六丈遂分東西內外洞。西外洞亦南向擴然透明五六丈。由西竇北入則西內洞矣。其內時夾時開時高盤時垂下覆頂平若幘裂隙成紋。至石形之異有疊蓮綴空挺笋特立者隨處布置不專以乳柱見奇也。計里許北過一隘西轉有峽北透天光時數炬更盡不復能由內洞返北躋後洞出穴北向僅中匍匐出洞已下北麓循麓東行過東北隅導者指其上列竇曰此東洞後穴也予卽欲從之入導者曰無炬須仍由前洞攜炬出從之環其東麓麓東一峰圓峙高踰此山竅穴離披導者謂都無深入竇然其北有石一枝離立起不由此不得路也復入東前洞縛炬內遊乳石奇變與西內洞等而深止得半不若西屢轉愈擴也東崖上穴駢連亟躋上則有門三穴聯翩北向而下無階級導者謂從其內西向躋暗夾中有道可出然愈上愈隘不若仍出前洞也出飯後導者復肩炬爲水洞龍洞遊水洞在山西南隅門亦南向中寬數畝潭水四際深不測其外淺處紫碧浮映日光所爍也門左右俱有重崖廻環潭上可循行以入各抵潭北崖插空兩路旁絕上無岐穴不識水洞何所止出洞循西麓北轉東得龍洞洞在山西北

西後洞西門亦北向中有水夾其上片石東西交成天生橋
焉五丈以內又度一梁篝火入西穿石柱夾漸大南入可半
里路窮下黑乃多燃火炬照耀之亦有深潭一泓澗水莫測
其大更逾水洞投石沉沉赤止而不流也已而熄炬消燄南
望隔潭深處杳杳光浮水面導人神以爲怪光使然子謂穴
影旁透導人曰昔邨人結筏窮之至其處輒不得穴安所得
倒影子曰此地深伏雖去洞頂甚遙然由門南出計去水洞
不遠或水洞之光由水中深映浮筏者但從上矚不及悟光
從水出耳若係靈怪豈有自古不一息者哉乃復明炬出洞
別導人西南十里抵安祿營爲潯貴兩縣中道處蓋羅叢巖

遊記

三册下
粵西二

三七

西北有崇山橫亘其東北自潯之西山直西南接貴縣北山
二山兩角高張東西相距幾百四十里中間峰巒橫疊翠環
雲繞頗似大容大容爲鬱江南條山界繡鬱兩江間此山爲
鬱江北條山亦界黔鬱兩江間貴縣之倚北山猶鬱林之於
大容西嶺潯州之倚西山猶容縣之於大容東峰皆東西窾
聳兩角中則連亘焉第大容東西八十里較近中有北流縣
界其間茲山較遠而別無縣治惟今安祿營爲中界耳

十二日自安祿西南二十六里直抵石山下爲平碣營營東
石峰峭立曰大巖山巖甚巨中容數千人南又窾一小山上
有平架石若橫橋其下透明出小山西爲馬鞍山亦峭聳起

皆平碣近峰也南望銳鋒若筆架若卓椎者在數里外望之
趨三里度石梁又南十二里直抵衆遙峰西麓日劈竹鋪眺
路左諸峰分岐競異卽貴縣東山也又西南十八里抵貴縣
南門則大江在其下靜聞與顧僕所附舟已先泊南門久下
船迨暮放舟乘月西行十五里而泊

十三日行十里西抵西山南東南轉十里爲宋邨由貴縣南
至南山十里南山至宋邨亦十里舟行屈曲水路倍之予先
擬一至貴縣卽往宿南山詰明從南山間道候舟詢之舟人
旣不得地名且云舟將連夜發遂不得行及發不過十餘里
卽泊今上午過宋邨悔不從初所擬至此登舟也又四十五
里夾江兩山起溯之入又乘月十五里泊香江驛
十四日過烏司壑已十里爲橫州界

遊記

三册下
粵西二

三十八

十五日掛帆三十五里抵橫州南門猶上午也是日爲中秋
節以行李及兩病人入南寧舟子獨入城徬江而東二里抵
下渡渡南岸爲寶華山道道甚大共十里過蒙氏山庄又一
里東向入山二里抵山下披叢入之寺尙在半山澗澗拾級
又半里得寶華寺門西向寺旁無他勝問所謂山後瀑布僧
謂墜自後嶺高百丈峽爲叢木所翳行絕蹊望之無所睹惟
從嶺而上可聞其聲耳予乃曳杖上嶺自巔至峽皆紛植蔽
虧子直造山頂風瀑怒聲不止瀑果不可見嶺南下五十里

卽靈山縣矣乃返寺宿

十六日自寶華下山十里望東北鳳凰諸石峰在三十里外
路遠不及往遂西抵州由上渡渡江入南寧舟

十七日舟西南行四十里抵陳步江內通小舟欽州鹽俱從
此出是日靜聞病轉劇

十八日舟至是多西北行旁皆土山繚繞蓋自入鬱江惟鳳
凰山石崖駢立瞰江餘皆壤阜耳又三十五里泊江西岸

十九日平明行五里過火焰驛爲永淳縣界於是舟北轉歷
十二磯磯在江右涯盤石橫突江畔又四十里抵永淳南門
二十日北繞永淳東旋西繞其北江幾環城四隅矣於是始

遊記 三册下
粵西二

三五

西北行共四十里過伶仃水五里泊

二十一日西南五十里八尺江自西來入江發源自欽州通
舟可抵上思州遂西泊黃花驛驛去南寧府尙五十里

以下八月二十二日至九月二十日凡遊南寧者皆佚

裔孫 熙海南校字

08453

